

# De'en Bzejni'i Jesocristán' San Juannə' Nich Bzoje'en Par Chio'o

Diozən' bene' par nich Jesocristán' bzejni'ine' San Juannə' de'e quinga

**1** Nada' Juan naca' beṇə' güen xšin Jesocristán'. Diozən' blo'ine' Jesocristán' de'e quinga de'en bzejni'ine' nada' par gwlo'ida'an yeziqə'əchlə beṇə' chso'elaogü'e'ene'. Bsele'e angl che'ena' par bzejni'ine' nada' de'e quinga par nich ənezecho de'e ca' gaquə lgüegwzə. <sup>2</sup>Na' bacho'a dižə' che yoguə'əlol de'e quinga de'en blo'ine' nada', na' yoguə'əlol de'en bzene Diozən' nada' na' de'en bzejni'i Jesocristán' nada'.

<sup>3</sup>Mbalaz n̄itə' beṇə' ca' yoso'olabe' de'e nga chzoja' nga de'en bzene Diozən' nada'. Na' mbalaz n̄itə' beṇə' ca' əse'ene len catə' beṇə' yoblə yoso'olabe'en. Mbalaz n̄ite'e šə yoso'ozenague'en, chedə' bazon gaquə de'e ca' blo'ine' nada'.

Juannə' chzoje' beṇə' ca' chso'elao' Jesocristán' yež ca' gažə

<sup>4</sup>Nada' Juan chzoja' le'e chdopə chžagle cho'ela'ole Jesocristán' Asian', le'e nitə'əle yež ca' gažə. Diozən' sošgue' gaquəlene' le'e na' gone' ca so cuezle binlo len xbab

de'en yo'o lo'o yichjla'ažda'olen', Dioz ben' bazoczə catə'an bxi'e yežlyon', na' ca'acən' soe' catə'an yeyož yedon. Na' Spirit che Diozən' de'en naquə ca gažə Spirit zon lao Diozən' gan' chi'e chnabi'e na' sošgan gaquəlenən le'e na' gonən ca so cuezle binlo len xbab de'en yo'o lo'o yichjla'ažda'olen'. <sup>5</sup>Na' lecəzə Jesocristán' sošgue' gaquəlene' le'e na' gone' ca so cuezle binlo len xbab de'en yo'o lo'o yichjla'ažda'olen'. Jesocristán' be'e dižə' che Diozən' na' xtiže'enə' naquən de'e li. Len' naque' beṇə' nech bebane' ladjo beṇə' guat ca' par chnabi'e. Jesocristán' chnabi'e notə'ətezə beṇə' chəsə'anabia' yežlyo nga. Chaque Jesocristán' checho na' babnitlaogü'e' xtolə' chio'o chonlilažə'əchone' ca de'en blalj xchene'enə' catə'an bnežjw cuine' gwso'ote'ene'. <sup>6</sup>Gwleje' chio'o par nich nabi'acho txen len le' ca no rei na' par nich sotezə socho güe'ela'ocho Xə' Diozən' can' gwnitə'ətezə gwnitə' b̄xoz che beṇə' Izrael ca' gwse'ejni'alaže'e Diozən'. Jesocristán' chnabi'e zejlicane. Ledoye'ela'oche' na'a na' zejlicane. Can' gonšgaczczo.

<sup>7</sup>Le'e gon xbab, la' Jesocristən' yetje' to lo'o bejw. Na' yoguə'əlol beṇə' yesə'əle'ine' le', lente beṇə' ca' gwsə'ot le', na' beṇə' ca' ža' doxen yežlyon' yesə'əbežyaše'e de'en cui gwsə'onlilaže'ene'. Can' na' Diozən', na' ca'aczən' gaquə.

<sup>8</sup>“Nadan' naca' ben' ben yežlyon' na' ben' gon par nič te čhei.” Can' na' Xancho Diozən' ben' napə le'ezelaogüe yelə' guac xennə', ben' bazoczə catə'an bxi'e yežlyon', na' ca'aczən' soe' catə'an yeyož yedon.

**Juannə' ble'idaogüe'ene' Cristən'  
len yelə' chey che'eni' che'enə'**

<sup>9</sup>Nada' Juan naca' beṇə' bišə'əle čhedə' naccho txen cho'ela'ocho Cristən' na' txennə' choso'oči' choso'osaquə' beṇə' chio'o. Txennə' chnabia' Diozən' chio'o na' txen chgo'o chčejlažə'əcho len yoguə' de'en chac čecho čhedə' ngodə'əcho txen len Jesocristən'. Zoa' isla nga de'en ne' Patmos la' naca' pres por ni čhe de'en bagwdixjui'a xtižə' Diozən' na' babi'a dižə' čhe Jesocristən'. De'e na'anə' baboso'osele'e nada' nga. <sup>10</sup>Na' to ža' dmigw Spirit čhe Diozən' benən par nič ble'idaogüe'eda' to de'en ble'idaogüe'eda'. Na' benda' gwne to beṇə' coža'anə' zižjochgua ca zižjon' chbež trompet. <sup>11</sup>Na' gože' nada': —Nadan' naca' ben' ben yežlyon' na' ben' gon par nič te čhei. Bzoj dižə' čhe de'e quinga le'idaogüe'edo'onə' to le'e libr na' selo'o librən' lao beṇə' ca' chesə'ədoṇə' chesə'əžag chso'elaogüe'e nada' Asia, beṇə' ža' Efeson' na' Esmirna, na' Pergamo, na' Tiatira, na' Sardis na' Filadelfia na' Laodisea.

<sup>12</sup>Na' gwyečhja' bgüia' non' cho'elen nada' dižə' na' ble'ida' gažə' candeler de or. <sup>13</sup>Na' gwchol candeler ca' gažə' ble'ida' Xi'in Diozən' ca' to beṇə'ch. Na' nyaze' to lachə' toṇə' de'e bžinte yen ni'e. Na' nchej cho'alcho'enə' to sinš de or. <sup>14</sup>Na' yišə' yichje'enə' naquən ca xa xilə' šyiš na' ca' be'eyə'. Na' jelaogüe' ca' chsa'actitən ca' to yi' de'e chalə'əni. <sup>15</sup>Na' ble'ida' ni'enə' chactitən ca' to brons de'e nłachgua catə' xoa' lao yi'. Na' xne čhe'enə' nenən ca' chziž yaon' catə' dechguan. <sup>16</sup>Na' noxə'e gažə' beljw len ne'e ličan', na' cho'enə' zo to spad de'e nła čhopə' la'ate. Na' ble'ida' cho'alaogüe'enə' can' chle'icho bgüižən' catə'an chnə'chguan.

<sup>17</sup>Na' beyož ble'ida'ane' bgüižə' xni'enə' gota' šlat. Nach bli ne'e ličanə' bexe'e na'anə' na' gože' nada': —Bito žebo'. Nadan' naca' ben' ben yežlyon' na' ben' gon par nič te čhei. <sup>18</sup>Nada' naca' Dioz ben' zo zejlicanə. Ca' de'en bida' goca' beṇə'ch gwsə'ote' nada', pero na' bebana' ladjo beṇə' guat ca' na' soa' zejlicanə. Nada' napa' yelə' gwnabia' par ənia' batən' sa'at to to beṇə' na' napa' yelə' gwnabia' par ənia' non' žjəya'ac gabilən'. <sup>19</sup>Na' ža' bzoj dižə' čhe de'e ca' bable'ido', na' čhe de'e ca' chac ṇa'a na' čhe de'e ca' ze'e za'ac. <sup>20</sup>Bito gwyejni'ido' čhe beljw ca' gažə' de'en noxa'a na' čhe candeler de or ca' gažə'. Beljw ca' gažə' zejen gažə' beṇə' ca' zjəyo'o lao ne'i beṇə' ca' chesə'ədoṇə' chesə'əžag chso'ela'ogüe'e nada' yež ca' gan' mbane Asia. Na' candeler ca' gažə' zejen gaž cuen beṇə' ca' chso'onlilažə' nada'.

Dižə' de'en be'e par beṇə' ca'  
chso'elao' Jesocristən' yež ca'  
gažə: De'en gože' beṇə' Efeso ca'

**2** Bzoj de'e nga par ben' naquə  
lao ne'i beṇə' ca' chesə'ədopə  
chesə'əžag chso'elaogü'e nada'  
Efeson' na' yo'one' de que nada'  
ben' ble'ido' noxə' gažə beljw  
ca' na' chgüia chya' candeler de  
or ca' gažə, əchnia' dižə' quinga:  
<sup>2</sup>“Neze nle'ida' ca güennə' chonle,  
can' zotezə zole chonle xšina'anə'  
sin cui chjəxaquə'əlažə'əle,  
na' can' cui chzenagle che  
beṇə' mal ca' chəsə'əna  
zjənaque' apostol. Babgüiale  
can' chso'one' na' chacbe'ile  
de que bito bselə'əga'aca'ane'.  
<sup>3</sup>Chgo'o chchejlažə'əle len  
de'en chy' chzaquə'əle na'  
zotezle chonle xšina'anə' sin cui  
chjəxaquə'əlažə'əle. <sup>4</sup>Pero de to  
de'en cui chazlaža'a can' chonle,  
cuich chaquele chia' can' bagoquele  
chia' antslə. <sup>5</sup>Le'e gon xbab can'  
gocchgüeile chia' antslə na' cuich  
chactequele chia' na'a. Le'e gon  
xbabən' par niçh yedinjele de'en  
cuich chactequele chia' na' legonch  
can' benle antslə. Na' šə cui  
yedinjele de'e malən', yedəyena'  
le'e castigw nach yebiža'a len  
le'e. Bitoch gacle candeler chia'  
šə cui yedinjele xtolə'əlen'. <sup>6</sup>Pero  
la'anə'əczə bito chonle doxen can'  
chazlaža'anə', chebeida' de que  
chgue'ile de'e malən' chso'on beṇə'  
ca' zjənzi' nicolaitos, la' leczə nada'  
chgue'ida' can' chso'one'ənə'. <sup>7</sup>Le'e  
žia nagle de'e chene, le'e gwzenag  
che de'en bagwna Spirit che Diozən'  
par le'e chdopə chžagle cho'ela'ole

nada'. Notə'ətezle chzoile cui  
chzenagle che de'e malən', gua'a  
latjə gaole frotən' de'en chbia lao  
yag yelə' mbanṇə' de'en zo gan' zo  
Diozən'.”

De'en gože' beṇə' Esmirna ca'

<sup>8</sup>Na' leczə bzoj ben' naquə  
lao ne'i beṇə' ca' chesə'ədopə  
chesə'əžag chso'elaogü'e nada'  
Esmirnan'. Bzoje' gože' de que nada'  
naca' ben' ben yežlyon' na' ben' gon  
par niçh te chei. Na' gwsote' nada'  
lao bida' goca' beṇəch pero bebana'  
ladjo beṇə' guat ca'. Na' leczə  
yo'one' de que nada' əchnia' dižə'  
quina: <sup>9</sup>“Neze nle'ida' ca güennə'  
chonlen', na' neze nle'ida' can'  
choso'oçhi' choso'osakuə' beṇə' le'e  
na' can' nyašə'əchgua chac chele.  
Pero la'anə'əczə banga'anyašə'əle  
lechgualə mbalaz zole. Nezdə'  
can' choso'ožia choso'onitə' beṇə'  
gwlaž chele ca' le'e, beṇə' ca'  
gwsa'alje' lao dia che de'e Izraelən'.  
Lao Diozən' bito zjənaque' beṇə'  
Izrael sino zjəncodə' ljuəžje par  
chso'one' txen len gwxiye'ənə'  
de'en le Satanas. <sup>10</sup>Bito žeble de'e  
ca' ze'e za'ac de'en saquə'əzi'ile.  
Gwxiye'ənə' gonən ca yesə'əyixjue'  
ballə ližya par niçh ca' co'oyelə'ən  
le'e cuejyichjle xtiža'anə'. Lao ši  
ža saquə'əzi' saquə'əyašə'əle. Pero  
na' lešotezə lešo legwzenag chia'  
la'anə'əczə šə so'ote' le'e por ni  
che de'en chzenagle chia'. Na' šə  
sotezə sole gwzenagle chia' nachən'  
gona' ca əbanle len nada' zejlicane.  
<sup>11</sup>Le'e žia nagle de'e chene, le'e  
gwzenag che de'en bagwna Spirit  
che Diozən' par le'e chdopə chžagle  
cho'ela'olene'. Notə'ətezle chzoile

cui chzenagle che de'e malən', bito gac chele can' gac che beṇə' ca' yesə'əzaquə'əzi'e zejlicane, de'en ṇacho yelə' got əgwchope."

#### De'en gože' beṇə' Pergamo ca'

<sup>12</sup>Na' lecəə bzoj ben' naquə lao ne'i beṇə' ca' chesə'ədopə chesə'əžag chso'ela'ogüe'e nada' Pergamon'. Bzoje' gože' de que nada' ben' ble'ido' zo spadən' cho'anə' de'e ṇla chopə la'ate əchnia' dižə' quinga: <sup>13</sup>"Nezda' de que zole lao syodan' gan' chnabia' Satanəsən' na' gan' lechgualē choso'ozenag beṇə' chei. Neze ṇle'ida' ca güennə' chonle, can' zotezə zole chonlilažə'əle nada' na' can' cui chbejyichjle xtiža'anə' de'en chejle'ele chei, na' nic catə'an gwso'ote' Antipasən' gan' zolen', ben' gwzotezə gwzo be'e dižə' li chia'anə' lao syoda chele gan' zo Satanəsən'. <sup>14</sup>Pero de to chopə de'en chonle de'en cui chazlaža'a. Nita' ballē chonle de'e malən' ca de'en bzejni'i de'e profet Balaannə' de'e Rei Balaquən'. Na' Balac na'anə' bene' ca besə'əxopə beṇə' Izrael ca' gwso'one' de'e malən', zane' gwsə'ogüe' yelə' guao de'en naquə che lgua'a lsaquə'an gwse'ejni'alaže'e na' bosə'oža' xtoga'aque' lao gwse'ejni'alaže'e lgua'a lsaquə' che beṇə' Moab ca'. <sup>15</sup>Lecəə can' chac len le'e, ballē naole de'en nac ca' de'en chsed chlo'i beṇə' ca' zjənzi' nicolaitos de'enə' chgue'ida'. <sup>16</sup>De'e na'anə' le'e yedinje de'e malən' chonle. Šə cui yedinjele de'e malən' chonle, yida' lguēgwzə na' gona' par gacle castigw, la' xtiža'anə'

gwxaquə'əleben ca to spad. <sup>17</sup>Le'e žia nagle de'e chene, le'e gwzenag che de'en bagwna Spirit che Diozən' par le'e chdopə chžagle cho'ela'ole nada'. Notə'ətezle chozile cui chzenagle che de'e malən', gona' le'e yoguə'əloj de'en chyažjele par sole mbalaz yoban' zejlicane, na' gona' yej fin par to tole nič ənezele de que chebeida' le'e. Na' le'e yejən' nyoj to la de'e cobə na' ben' goxə' yej na'azə ənezene' bin' nyojən."

#### De'en gože' beṇə' Tiatira ca'

<sup>18</sup>Bzoj de'e nga par ben' yo'o lao ne'i beṇə' ca' chesə'ədopə chesə'əžag chso'ela'ogüe'e nada' Tiatiran'. Bzoje' gože' de que nada' naca' Xi'in Diozən' ben' ble'ido' chsa'actit jəlaogua'anə' ca to yi' de'en chalə'əniṇ na' ṇi'anə' ca to brons de'en lachgua. Na' yo'one' de que nada' əchnia' dižə' quinga: <sup>19</sup>"Neze ṇle'ida' de'e güennə' chonle, na' can' chaquele chia' na' che ljuežj beṇə'chle, can' chonlilažə'əle nada' na' can' chaclen ljuežjle. Nezda' can' chgo'o chchejlažə'əle len bitə'ətezə de'e chac chele, na' nezda' chonchle güen na'a cle ca can' babenle catə'an gwzolaole chonlilažə'əle nada'. <sup>20</sup>Pero na' chonle de'e cui chazlaža'a can' cho'ele latjə par nič no'olən' gwxaquə'əlebene' ca de'e Reina Jesabelən' chsed chlo'ine' le'e ne' de que cho'e xtižə' Diozən'. Chxoayague' balə le'e chonlilažə'əle nada', che'e le'e de que naquən güen əgwša' xtole na' gaole yelə' guao de'en chəsə'əne' naquən che lgua'a lsaquə'an chse'ejni'alaže'

benə'. <sup>21</sup>Babnežjua'ane' tyemp par yedinjene' de'e mal ca' chone', pero bito chene'ene' yedinjene'en. <sup>22</sup>De'e na'anə' gona' par niçh gaquəšenene', na' le'e chonle txen len le', gona' par niçh əzaglaochgualə šə cui cuejyichjle cuich gonle de'e mal de'en chsedene' le'e chonle. <sup>23</sup>Na' ca naquə benə' ca' bagosə'əbejyichje' xtiža'anə' par choso'osed choso'olo'ine' de'e malən' gožga'aque' de que gotga'aca'ane'. Na' catə' gona' ca' yoguə'əlo' le'e chdopə chžagle cho'ela'ole nada' gatə'ətezə, gache'ile de que neze nle'icžəda' xbab de'en yo'lo lo'o la'ažda'olen' na' bin' chebeile. Na' gona' par niçh to tole sole mbalaz o si'ile castigw segon naquən' babenle. <sup>24</sup>Pero na' le'e yelə'ale zole Tiatiran', le'e cui naole de'en chsed chlō'i no'olən' na' cui nsedle de'en chəsə'əne' chse'ejni'ine' che Satanasən' de'en ngašə'ən len benə' yeziquə'əchlə, bito nia' bichlə de'e cheyalə' gonle. <sup>25</sup>Con sotezə sole gonle de'e güennə' par niçh bachonle ca' catə'ən yida' de'e yoblə. <sup>26</sup>Notə'ətezle chzoile cui chzenagle che de'e malən' na' zotezə zole chonle can' chazlaža'anə' xte catə'ən yida' de'e yoblə, gona' par niçh nabi'ale nasyon ca' txen len nada'. <sup>27</sup>Ca Xa'anə' babene' par niçh chnabia'aga'aca'an, leczə can' le'e nabi'alēn txen len nada' na' goncho ca yesə'əzəxjwyichj benə' nasyon ca', na' əgwžiyai'iga'acchone'. <sup>28</sup>Na' gona' par niçh gombi'ayanə'əle nada' len yelə' chey che'eni' chia'anə', nadan' gwxaquə'əlebəda' ca beljw xsilən'. <sup>29</sup>Le'e žia nagle

de'e chene, legwzenag che de'en bagwna Spirit che Diozən' par le'e chdopə chžagle cho'ela'ole nada'."

### De'en gože' benə' Sardis ca'

**3** Bzoj de'e nga par ben' naquə lao ne'i benə' ca' chesə'dopə chesə'əžag chso'elaogüe'e nada' Sardisən'. Bzoje' gože' de que Spirit che Diozən' de'en naquə ca gažə spirit zon len nada' na' gože' de que naca' ben' ble'ido' noxa'a gažə beljw ca', na' nada' əchnia' dižə' quinga: "Neze nle'ida' can' chonlen'. Nezdə' can' chəsə'əna benə' de que naple yelə' mban zejlicanen', pero zanle nacle ca benə' guat par len nada' de'en cui chzenagle chia'. <sup>2</sup>Leyeban bin' chonle, legonlilažə'əch nada' na' legaquəche chia' na'a žlac cuinə' yeyož cuejyichjle nada'. Nezdə' de que Diozən' bito chebeine' can' chonle, Dioz ben' leczə cho'elaogua'a. <sup>3</sup>Le'e žjsa'alažə' xtiža'anə' de'en bosə'ozejni'i benə' le'e na' de'en bzenagle chei antslə. Le'e gwzenag chei de'e yoblə na' yedinjele de'e malən' chonle. La' šə cui gonle xbab yedinjele de'e malən' yedəyena' le'e castigw na' senyala' le'e can' chon to benə' bguan ben' chidə ca orən' cui chonle xbab yide'. <sup>4</sup>Na' la'anə'əczə zanle zole Sardisən' cui chonle can' chazlaža'anə', bia'aczə ne'e nitə' balle cui da əchen de'e malən' yichjla'ažda'olen'. Na' le'e cui bi de'e mal da chen yichjla'ažda'olen', gwžin ža catə' le'e talenle nada' gan' zoa'anə' na' chazle lachə' šyiš, chedə' le'e zaquə'əle par talenle nada'. <sup>5</sup>Notə'ətezle chzoile cui chzenagle che de'e malən', guacua'

le'e lachə' ši'yiš na' bito yoxia' lalen'  
le'e libr chia' gan' nyoj la beṇə' ca'  
zjənapə' yeḷə' mban zejlicane. Na'  
gua'a dižə' len Xa' Diozən' na' len  
angl che' ca' de que bagwcu'a le'e  
ca xi'ina'. <sup>6</sup>Le'e žia nagle de'e chene,  
legwzenag che de'en bagwna Spirit  
che Diozən' par le'e chdopə chžagle  
cho'ela'ole nada'."

#### De'en gože' beṇə' Filadelfia ca'

<sup>7</sup>Bzoj de'e nga par ben' naquə  
lao ne'i beṇə' ca' chesə'əadopə  
chesə'əžag chso'elaogüe'e nada'  
Filadelfian'. Bzoje' gože' de  
que nada' naca' beṇə' la'aždao'  
xi'ilažə' juisy na' syempr chona'  
can' ənia'anə'. Nada' chnabia'  
doxenlə can' bagwnabia' de'e  
Rei Dabin' Izraelən'. Napa' yeḷə'  
chnabia' par ənia' non' yedəso  
len nada' na' non' cui yedəso len  
nada'. Na' notono gaquə gon par  
nič gwš'a'a can' ənia'anə'. <sup>8</sup>Bzoje'  
gože' de que nada' əchnia' dižə'  
quinga: "Neze nle'ida' ca güennə'  
chonle. Na' la'anə'əczə cui naquə  
zanle, zotezə zole chonle can'  
ənia'anə' na' bito chbejyichjle de'en  
chonlilažə'əle nada'. De'e na'anə'  
babena' par nič nitə' beṇə' zan  
beṇə' chse'enene' yoso'ozenague'  
che xtižə' Diozən' de'e güe'elenle  
lega'aque' na' notono no gaquə  
gwžon par cui chixjue'ilen  
lega'aque'. <sup>9</sup>Na' ca naquə beṇə'  
ca' gwsa'aljə lao dia che de'e  
Izraelən' beṇə' ca' zjəncodə' ljuežje  
chso'one' txen len Satanasən', lao  
Diozən' bito zjənaque' beṇə' Izrael.  
Chso'onlažə'e chəsə'əne' chebei  
Diozən' lega'aque'. Na' gona' par  
nič yesə'əzo xibga'aque' laolen'

yesə'əne' de que nacle beṇə'  
zaque'e len nada' na' sa'acbe'ine'  
de que chacda' chelen'. <sup>10</sup>Na' ca  
naquə zotezə zole chzenagle che  
xtižə'anə' de'en cho'en dižə' can'  
bguo'o bchejlažə'a len de'e mal  
de'en goquə chia', nada' gona' par  
nič yechojle güen catə' əžin or  
saquə'əzi'ichgua yoguə' beṇə'chən'.  
Cana' la'alao nac chon to to  
beṇə'chən', šə chzenague' chia' o  
šə chzenague' che de'e malən'.  
<sup>11</sup>Bazon əžin ža yida' de'e yoblə.  
Lesotezə leso legon de'e güennə'  
par nič ca' bito bi gwžon gona'  
ca əbanle len nada' zejlicane.  
<sup>12</sup>Notə'tezle chzoile cui chzenagle  
che de'e malən', gona' par nič sole  
txen len Diozən' zejlicane, Dioz  
ben' cho'elaogua'a. Na' zejlicane  
yega'anlenlene'. Na' gona' par nič  
gagle xi'in Diozən' zejlicane, na'  
sole syoda Jerosalen de'e naquə  
de'e cobə, syoda che Diozən' de'en  
chi' yoban' de'en gwletje' lao  
yežlyon'. Na' gwzoja' lao xga to tole  
la'anə' de'en naquə de'e cobə. <sup>13</sup>Le'e  
žia nagle de'e chene legwzenag che  
de'en bagwna Spirit che Diozən'  
par le'e chdopə chžagle cho'ela'ole  
nada'."

#### De'en gože' beṇə' Laodisea ca'

<sup>14</sup>Bzoj de'e nga par ben' naquə  
lao ne'i beṇə' ca' chesə'əadopə  
chesə'əžag chso'elaogüe'e nada'  
Laodisean'. Bzoje' gože' de que  
nada' naca' ben' chon par nič  
chac can' che'enda'anə'. Cho'a  
dižə' de'en bagwna Diozən' nada'  
na' naquən de'e li. Nada' bena'  
yoban' na' yežlyon', beṇə'ch, angl,  
bia chsa'aš na' yeziquə'əchlə de'e

zjəde. <sup>15</sup>Bzoje' gože' de que nada' əchnia' dižə' quinga: "Neze nle'ida' can' chonlen', bito chgue'ile nada' pero ni que chaquele chia' do yichj do lažə'əle. Yebeichləda' žalə' chgue'ile nada' o žalə' chaquele chia' do yichj do lažə'əle. <sup>16</sup>Na' laogüe de'en cuitec chonle cas chia' na' cui chaquele chia' do yichj do lažə'əle, la'anə'əczə bito chgue'ile nada', bia'aczə žin ža cuejeyichja' le'e cuich gonəda' le'e ca xi'ina'. <sup>17</sup>Le'e nale zole mbalaz, na' de que chonle de'e güen juisy, na' de que bito bi bi chac falt chele par nich yebei Diozən' le'e. Bito chacbe'ile de que de'e malchguan' chonle na' de'e malchguan' gaquə chele. Bito chebei Diozən' le'e. Nchöl yichjla'ažda'olen' na' nachbia'axejə chonle de'e malən'. <sup>18</sup>De'e na'anə' chona' le'e consejw legonlilažə' nada' par nich gona' ca gacle beņə' güen can' naca'anə'. Le'e yedinje xtolə'əlen' par nich gaquə la'ažda'olen' xi'ilažə' na' cuich gonle de'e malən' lao Diozən'. Na' le'e güe' latjə yocobə Diozən' xbab chelen' par nich šo'o be'eni' che'lenə' lo'o yichjla'ažda'olen'. <sup>19</sup>Notə'ətezə beņə' chacda' chei cho'ane' consejw na' chona'ane' castigw catə' chone' de'e mal. De'e na'anə' le'e cuec yichjle par yedinjele xtolə'əle ca'. <sup>20</sup>Gwxaquə'əlebəda' ca to beņə' zecha cho'a puert chelen' chne' na' chsiže' le'e puertən'. Notə'ətezle šə gwzenagle chia' na' šə əsaljwle par šo'a, yedəsoa' len le'e na' gona' par nich sole mbalaz txen len nada'. <sup>21</sup>Na' notə'ətezle šə chzoile cui chzenagle che de'e malən', gona' par nich cue'elenle nada' gan' chi'a

chnabi'a, ca nada' chi'ilena' Xa'anə' chnabi'ato' dezd catə'ən beyož bzoa' gwxiye'enə' xni'anə'. <sup>22</sup>Le'e žia nagle de'e chene, legwzenag de'en bagwna Spirit che Diozən' par le'e chdopə chžagle cho'ela'ole nada'."

**Ble'idaogüe'ene' Diozən'  
chi'e chnabi'e yoban'**

**4** Beyož bzoja' de'e ca' gwne' nada', bgüia' na' ble'ida' nyaljo to puert yoban' na' benda' cho'elen ben' nada' dižə', ben' benda' de'e nechən' ben' naquə xne che'lenə' zižjochgua ca zižjon' chbež trompet. Lecze'en gwnechcze' nada' de'e yoblə, gwne': —Gwyep gan' zoa' nga par nich gwzejni'ida' le' de'e ca' ze'e gaquə.

<sup>2</sup>Nach ca orən' ben Spirit che Diozən' par nich ble'idaogüe'eda' Diozən' gan' chi'e yoban' chnabi'e. <sup>3</sup>Na' ble'ida' ben' chi' chnabi'a' naque' ca to de'e chactit, ca yej fin de'en nzi' jasje na' cornalina. Na' to de'en naquə ca to yitə' gwyechjən gan' chi'enə' de color ga' ca yej fin de'en ne' esmeralda. <sup>4</sup>Na' cuit cue'ej Diozən' gan' chi'e zjəchi' tapechoa beņə' golə beņə' blao beņə' chəsə'anabia' txen len le'. Zjənyaze' lachə' šyis na' zjəzo coron de or yichj to toga'aque'. <sup>5</sup>Na' gan' chi' Diozən' chep yes na' chac sšag, na' chašjw chtin. Na' laogüe'enə' nitə' gažə yi' de'e chalə'əniñ. Na' yi' ca' gažə zjənaquən Spirit che Diozən'. <sup>6</sup>Na' laogüe' gan' chi'enə' nžiljw to de'e chle'icho ca to nisdao' de bidr o de be'eyə'.

Na' nitə' tap bia gan' chi' Diozən', tğijəb nitə' cuiten' chopə la'ate, yetob cože'enə' na' yetob laogüe'enə', na'

žia de'e zan jəlaoga'acquəb delant na' traslə. <sup>7</sup>Bia nechən' naquəb ca to leon, na' bia əgwchopen' ca to go'ou, na' cho'alao bia əgwyonen' naquən ca cho'alao beṇəch, na' bia əgwdapen' naquəb ca to bsia bian' chzo. <sup>8</sup>Na' to to bia ca' tap žia xop güejə xilə'əga'acquəb, na' doxen cuerp čhega'acquəbən' žia de'e zan jelaoga'acquəb lo'olə na' fuerlə. Na' do ža do yel bito chəsə'əbezəb, yapəyoe chəsə'ənanab:

Lechgualē beṇə' la'aždao' xi'ilažə'  
juisy naquə Xancho Diozən' ben'  
napə le'ezelaogüe yelə' guac xen.  
Bazocze' catə'an bxi'e yežlyon',  
na' ca'aczən' soe' catə'an  
yeyož yedon.

<sup>9</sup>Na' yoguə' las catə' bia ca' chso'eb dižə' chso'ela'ob Diozən' ben' chi' chnabia' ben' zoczə zejlicane, yoguə' laste catə'an chso'eb yelə' bala'an na' yelə' choxcwlen čhe', <sup>10</sup>beṇə' golə beṇə' blao ca' tapechoa chəsə'əzo xibga'aque'en lao Diozən' ben' zo zejlicane chso'elaogüe'ene' na' choso'onite'e coron čhega'aque'en xni'enə', chəsə'əne':

<sup>11</sup>Xanto' Dioz, len' beno'  
beṇəch, angl, bia ca' ža', na'  
biquə'əchlə de'en zjəde,  
čhedə' can' gwyazlažə'o  
na' čhedə' go'ondo' nitə'  
beṇəch, angl, bia ca' ža' na'  
biquə'əchlə de'en zjəde.  
De'e na'anə' zaquə'əczo' par  
chnabi'o, par si'o yelə' bala'an,  
na' par əyējaogə'o.

**Ben' gwxaquə'əlebe ca xilə' dao'  
gwsə'ot beṇə' Izrael ca' par  
gwnitlao xtolə'əga'aque'enə'**

**5** Na' ble'ida' Dioz ben' chi' chnabia' noxe'e to rollo de'en

nyoj čhopə la'ate na' nyeyjon len gažə sey. <sup>2</sup>Na' ble'ida' to angl gual na' gwne' zižjo: —čNon' zaquə' par əgwzoxje' sey ca' par nič šaš rollon'?

<sup>3</sup>Pero ni que no nitə'əzə yoban', ni lao yežlyon' ni gan' ža' beṇə' guat ca' no gaquə gwzaše' rollon' na' ni par əgğüiəze'en. <sup>4</sup>Na' lechgualē gwchežə' de'en cui no de beṇə' zaquə' par əgwzaše' rollon' na' par gwlabə'en na' ni par əgğüiəze'en. <sup>5</sup>Nach to beṇə' golə beṇə' blao entr beṇə' ca' zjəchi' cuit cue'ej Diozən' gože' nada': —Bito cuežo'. Jesocristən' ben' gwxaquə'əlebe ca to leon laogüe de'en babzoe' gwxiye'enə' xni'enə', le'enə' zaque'e par əgwzaše' rollon' na' par əgwzoxje' sey ca' gažə. Len' golje' lao dia čhe de'e Jodan' can' goljə de'e xaxta'ogüe'e Rei Dabin'.

<sup>6</sup>Nach ble'ida'ane' zeche' entr Diozən' gan' chi'e chnabi'e na' bia ca' tap. Na' beṇə' golə beṇə' blao ca' zjənyechj zjəmbi'e lega'aque'. Ble'ida'ane' ca to xilə' dao' bian' bagwsə'ote', to xilə' bia žia gažə loze na' gažə jelaob. Na' jelaob ca' gažə zjənaquən Spirit čhe Diozən' de'en chon xšine'ena' doxenlə lao yežlyon'. <sup>7</sup>Na' Jesocristən' ben' ble'ida' ca to xilə' bian' bagwsə'ote', jəxi'e rollon' de'en noxə' Diozən' len na' liche' gan' chi'e chnabi'e. <sup>8</sup>Na' catə' jəxi'e rollon' bia ca' tap besə'əzo xibga'acquəb laogüe'enə' na' beṇə' golə beṇə' blao ca' tapechoa leczə besə'əzo xibga'aque'enə' laogüe'enə'. Na' beṇə' golə beṇə' blao ca' zjənoxə'e tgüejə arpa na' tgüejə tas de or gan' chey yalən', na' yalən' zejen orasyon ca' de'en



chso'on beṇə' ca' bagwlej Diozən'  
 par zjənaque' lažə' ne'enə'. <sup>9</sup>Na'  
 gwsə'olē' to imno cobə de'en nan:  
 Zaco'o par jəxi'o rollon' na' par  
 bzoṁjə' sey chei ca',  
 chedə' bnežjw cuino' par  
 gwsə'ote' le'  
 na' blalj xcheno'onə' gwdixjo'  
 xtolə'əto'onə' par ničh  
 naquəto' xi'iq̄ Dioz.  
 Neto' naquəto' to to nasyon,  
 to to yež, na' to to dia na'  
 cho'eto' gwde gwdelə dižə'.  
<sup>10</sup>Na' gwlejo' neto' par chnabi'ato'  
 txen len le' ca no rei  
 na' zotezə zocho cho'ela'ocho  
 Xacho Diozən' can'  
 gwnitə'ətezə gwnitə'  
 bṁox che beṇə' Izrael ca'  
 gwse'ejni'alaže'e Diozən'.  
 Na' gwžin ža nabi'acho yežlyon'.  
<sup>11</sup>Nach bgüia' na' ble'ida' angl zan  
 juisy zjənyechje' gan' chi' Diozən'  
 chnabi'e na' gan' ža' bia ca' tap na'  
 beṇə' golə beṇə' blao ca'. Na' benda'  
<sup>12</sup>chso'e dižə'an zižjo chəsə'əne':  
 Jesocristən' gwxaquə'əlebene'  
 ca xilə' dao' ca' gwsə'ot  
 beṇə' Izrael ca' par gwnitlao  
 xtolə'əga'aque'enə'.  
 Na' zaquə'əcze' par chnabi'e  
 doxenlə,  
 na' par naquə che' yoguə'əte  
 de'en zjəde,  
 na' par nape' yoguə' claste yelə'  
 sin',  
 na' par nape' yelə' guac xen, na'  
 par nzi'e yelə' bala'an,  
 na' par nse'e yelə chey  
 che'eni' che Diozən' na' par  
 cho'ela'ochone'.

<sup>13</sup>Nach benda' yoguə' beṇəch ca'  
 ža' yoban' na' yežlyon' na' len beṇə'

žə' latjə che beṇə' guat ca' chso'e  
 dižə' chəsə'əne':

Zejlīcane güe'ela'ocho Diozən'  
 ben' chi' chnabi'  
 na' güe'ela'otecho Xi'iq̄ne'  
 Jesocristən'  
 ben' gwxaquə'əlebe ca xilə'  
 dao' ca' gwsə'ot beṇə'  
 Izrael ca' par gwnitlao  
 xtolə'əga'aque'enə'.  
 Zejlīcane güe'ega'acchone' yelə'  
 bala'an  
 na' zejlīcane güe'echo dižə' can'  
 zjəns'e yelə' chey che'eni'  
 na' can' zjənapē' le'ezelaogüe  
 yelə' guac xen.

Na' leczə can' gosə'əna bia ca' chaš  
 yežlyon', na' bia ca' chaš le'e yoban'  
 na' lo'o nis, na' len bitə'ətezəchlə  
 de'e zjəde.

<sup>14</sup>Nach bia ca' tap gosə'ənab: —  
 Ca'ašgacə gaquə.

Na' beṇə' golə beṇə' blao ca'  
 tapechoa besə'əzo xibga'aque' na'  
 gwsə'elaogüe'e Diozən' ben' zoczə  
 zejlīcane.

### Sey ca' gažə

**6** Na' ca naquə sey ca' gažə  
 ble'ida' cata' Jesocristən'  
 ben' ble'ida' ca to xilə' dao' bian'  
 bagwsə'ote' bzoṁje' ton. Na' benda'  
 entr bia ca' tap tob gwṇeb zižjo ca  
 zižjon' chašjw chtin, gwnab: —Da  
 bgüia de'e nga.

<sup>2</sup>Na' cata'ən bgüia', ble'ida' to  
 cabey bia šyiš na' ben' žia cožə'  
 cabeyən' noxə'e to xis goxītə'. Na'  
 zo to coron yichje'enə' na' bchoje'  
 chzoe' zan beṇə' xni'enə'. Na' zde'  
 par yeyož əgwzoe' beṇə' xni'enə'.

<sup>3</sup>Na' cata' Jesocristən' bzoṁje'  
 sey əgwchopen', benda' gwṇe bia

əgwchopen' gwnab: —Da bgüia de'e nga.

<sup>4</sup>Nach bchoj to cabey cua yin', na' ben' žia cožə'əbən' nape' yelə' chnabia' par ničh gone' ca cuich nitə' beṇə' ca' ža' yežlyon' binlo len ljuēžjga'aque', na' so'ot ljuēžjga'aque'. Na' ben' žia cabeyən' noxe'e to spad xen.

<sup>5</sup>Na' catə' Jesocristən' bzoṁje' sey əgwyonən' benda' gwne bia əgwyonən' gwnab: —Da bgüia de'e nga.

Na' catə' bgüia' ble'ida' to cabey gasj na' ben' žia cožə'əbən' noxe'e to xigonz. <sup>6</sup>Na' benda' to de'en gocda' gwna to beṇə' gan' ža' bia ca' tap gwne': —Ben par ničh tkilzə trigon' o tyagzə sebadən' guac yesə'əzi'e len laxjwga'aque' de'en chso'one' gan tža tža; pero bito gono' par ničh cui əžel set na' binon'.

<sup>7</sup>Na' catə' Jesocristən' bzoṁje' sey əgwdape, benda' gwne bia əgwdapən', gwnab: —Da na' bgüia de'e nga.

<sup>8</sup>Na' catə' bgüia' ble'ida' to cabey bia naquə ca color gašə' na' ben' žia cožə' cabeyən' le' Yelə' Got, na' yeto beṇə' naogüe'ene' le' Gabiḷ. Na' goquən lao na'aga'aque' gwsə'one' par ničh goc gwdiḷə, gocchgua yižgüe', goc falt de'e əse'ej əsa'o beṇə'chən', na' gwsə'ot bia znia ca' beṇə' zan. Na' lao goc ca', beṇə' zan ža' yežlyon' gwsə'ate'.

<sup>9</sup>Na' catə' bzoṁje' sey güeye'e ble'ida' mes gan' chso'elao' beṇə' ca' ža' yoban' Diozən'. Na' xni'a mesən' ble'ida' beṇə' guat ca' beṇə' ca' gwsə'ot beṇə' mal ca' lega'aque' por ni che de'en boso'ozenague'

xtižə' Diozən' na' gwsə'e dižə' de que chso'onlilaže'e Jesocristən'.

<sup>10</sup>Na' beṇə' guat ca' gosə'əne' zižjo gosə'əne': —Xanto', le' naco' beṇə' la'aždao' xi'ilažə' juisy, na' syempr chono' can' na'onə'. ĩBatə'əquən' gwnežjo' castigw che beṇə' mal ca' ža' yežlyon' ca de'en gwsə'ote' neto'.

<sup>11</sup>Nach Diozən' bnežjue' to to beṇə' guat ca' xala'anga'aque' de'e šyiš de'e gwsə'aze', na' gože' lega'aque' so'one' dezcanz yeto tyemp dao' xte catə'əch babeyož gwsə'ot beṇə' mal ca' beṇə' ljuēžjga'aque' ca' chso'elao' Cristən' con ca'ate'ənə' nžia Diozən' bia' sa'at.

<sup>12</sup>Na' catə' Jesocristən' bzoṁje' sey de'e gwxo'e, gocbe'ida' lechguale gwxo' na' bgüižən' beyaquən ca to lachə' gasj, na' bio'onə' beyaquən ca chen. <sup>13</sup>Nach beljw ca' besə'əyiṇjən besə'əžinten lao yežlyon' can' chac len frot de'e žia lao yag catə' chečhchgua be'. <sup>14</sup>Na' le'e yoban' benittecžən ca to rollo de'en chedobə na' yoguə' ya'a ca' na' islas ca' boso'oša' xišne'i. <sup>15</sup>Nach rei ca' beṇə' ca' chəsə'ənabia' lao yežlyon', len beṇə' blao ca' na' beṇə' gwni'a ca', len capitán ca', len notə'ətezəchlə beṇə' napə yelə' chnabia', na' len beṇə' zžənaquə esclabos txen len beṇə' ca' cui zžənaquə, yogue'e boso'ocuašə' cuinga'aque' do lo'o bloj na' entr yej xen ca' de'en žia lao ya'a ca'. <sup>16</sup>Na' gosə'əne': —Žalə'əšga əca'a bdiṇj na' yej quinga na' ya'a quinga yesə'əyenən chio'o ničh cui le'i Diozən' chio'o, Dioz ben' chi' chnabia', na' ničh cui gon Jesocristən' castigw checho,

Jesocrist ben' gwxaquə'əlebe ca xilə' dao' ca' gwsə'ot beṇə' Izrael ca' par gwnitlao xtolə'əga'aque'enə'.

<sup>17</sup>Gosə'əne' ca' chedə' gwsa'acbe'ine' babžin ža gaquə' juisyən' na' lechgualə yesə'əžaglaogüe' len castigon' de'en əgwnežjo Diozən' lega'aque'.

**Beṇə' Izrael ca' beṇə' ca' zjənyišə' sey che Diozən'**

**7** Gwde na' ble'ida' tap angl gosə'əzeche' tap part lao yežlyon' bosə'ozague'e be'enə' par niç cui gwyechjən lao yežlyon', lao nisdə'onə' o gan' ze yag ca'.  
<sup>2</sup>Nach ble'ida' yeto angl ze'e galən' chla' bgüižən' noxe'e to de'e gwchine' par gwchiše'e sey che Diozən' ben' zo zejlicane lao xga beṇə' ca' chso'elao' le'. Nach anglən' gwne' zižjo belgüiže' angl ca' tap, beṇə' ca' naquən lao na'aga'aque' so'one' par niç gaquə' de'e mal lao yežlyon' na' lao nisdə'onə'.  
<sup>3</sup>Gože' lega'aque': —Bito gonle par niç gaquə' de'e mal lao yežlyon', lao nisdə'onə' o gan' ze yag ca' xte catə' babeyož bchišə'əto' sey che Diozən' lao xga beṇə' ca' chso'elao' le'.

<sup>4</sup>Nach gwdechle benda' gwna anglən' de que to gueyoa tapeyon mil beṇə' bchiše'e seyən', yogue'e za'aque' lao dia ca' šižin che xi'in de'e Izraelən'.  
<sup>5</sup>Na' šižina mile' lao dia che de'e Jodan', šižina mile' lao dia che de'e Robennə', šižina mile' lao dia che de'e Gadən',  
<sup>6</sup>na' šižina mile' lao dia che de'e Aserən', šižina mile' lao dia che de'e Neftalin', šižina mile' lao dia che de'e Manasesən',  
<sup>7</sup>na' šižina mile' lao dia che de'e Simeonnə', šižina

mile' lao dia che de'e Lebin', šižina mile' lao dia che de'e Isacarən',  
<sup>8</sup>na' šižina mile' lao dia che de'e Sabolonṇə', šižina mile' lao dia che de'e Jwsen' na' šižina mile' lao dia che de'e Benjaminṇə'.

**Beṇə' zan zjənyaze' lachə' šyiš**

<sup>9</sup>Nach gwde na' bgüia' na' ble'ida' beṇə' zan juisy zjəzeche' lao Diozən' gan' chi'e chnabi'enə' na' lao Jesocristən' ben' gwxaquə'əlebe ca xilə' dao' ca' gwsə'ot beṇə' Izrael ca' par gwnitlao xtolə'əga'aque'enə'.  
Tant beṇə' zan zjəzecha xte notono no goquə' gwlab lega'aque', beṇə' naquə' to to nasyon, to to yež, to to dia na' chso'e gwde gwdele dižə'. Na' yogue'e zjənyaze' lachə' šyiš na' zjənoxe'e zin.  
<sup>10</sup>Na' tant besyə'əbeine' yogue'e gosə'əne' zižjo, gosə'əne':

Diozən' ben' chi' chnabia', na' Jesocristən' ben' gwxaquə'əlebe ca xilə' dao' ca' gwsə'ot beṇə' Izrael ca' par gwnitlao xtolə'əga'aque'enə', bagwsə'one' par niç cui yeyejcho lao yi' gabilən'.

<sup>11</sup>Na' yoguə'əlol angl ca' zjənyechj zjəmbi'e beṇə' golə beṇə' blao ca' na' bia ca' tap bian' nitə' gan' chi' Diozən' chnabi'e, nach angl ca' besə'əzo xibga'aque' lao Diozən' na' bchequə' yichjga'aque'enə' lao yon' gwsə'ela'ogüe'ene',  
<sup>12</sup>gosə'əne':

Gaquəšgan quinga. Zejlīcane güe'ela'ocho Dioz chechon'. Zejlīcane güe'echo dižə' can' nse'e yelə' chey che'eni', can' chnabi'e, can' nape' yelə' guac xen,

na' can' nse'e yoguə' claste yelə' sin'.

Zejlīcane güe'echo yelə' choxcwlen che' na' güe'echone' yelə' bala'an.

Ca'ašgaczən' gaquə'.

<sup>13</sup>Nach to beṇə' golə beṇə' blao ben' naque' txen len beṇə' tapechoa ca' gože' nada': —¿Eñezdo' no beṇə' quinga zjənyaz lachə' šyišən'? ¿Eñezdo' gan' za'aque'?

<sup>14</sup>Na' goža'ane': —Le' ñezdo' beṇə' gol dao'.

Nach gwne' nada': —Jesocristən' gwxaquə'əlebene' ca xilə' dao' ca' gwso'ot beṇə' Izrael ca' par gwnitlao xtolə'əga'aque'enə', chedə' blalj xchene'enə' par gwidxjue' xtolə' benachən'. Na' beṇə' quingan' gosə'əṇabene' le' bnitlaogüe' xtolə'əga'aque'enə'. Na' bitoch bi de'e mal da' əchen yichjla'ažda'oga'aque'enə'. Lega'aque' besə'ažglaochgüe' lao yežlyon' de'en chso'onlilaže'e Jesocristən'. <sup>15</sup>Na' de'e na'anə' nite'e lao Diozən' gan' chi'e chnabi'e chso'e yelə' choxcwlen che' do ža do yel gan' chso'elaogüe'ene' yoban'. Na' Dioz ben' chi' chnabia' zoe' len lega'aque' par chcuasə' chcue'eje' lega'aque' len de'e malən'. <sup>16</sup>Bitoch yesə'əbil yesə'ədonga'aque'. Bgüižən' bitoch gonən mal len lega'aque' na' bitoch yesə'əžglaogüe' len de'e zeyə'əṇə', <sup>17</sup>chedə' Jesocristən' ben' gwxaquə'əlebe ca xilə' dao' ca' gwso'ot beṇə' Izrael ca' par gwnitlao xtolə'əga'aque'enə' chapə chye' lega'aque'. Zoe' gan' chi' Diozən' chnabi'e na' chone' par nitə'əcze' mbalaz len Diozən'

zejlicane. Na' Diozən' gone' par nič cuich yesə'əbeže' na' cuich ñite'e trist.

### Sey gažən'

**8** Nach Jesocristən' ben' ble'ida' ca to xilə' dao' bian' bagwso'ote' bzoxxje' sey gažən', na' catə' beyož bzoxxje'ennə' lechguale žizə goquə yoban' do gašj or. <sup>2</sup>Nach ble'ida' gažə angl ca' beṇə' ca' zjəzecha gan' zo Diozən'. Diozən' bnežjue' lega'aque' tgüejə trompet. <sup>3</sup>Nach yeto anglən' bedəseche' cho'a mesən' gan' chso'elaogüe'e Diozən', mes de or de'en zo lao Diozən' gan' chi'e chnabi'enə'. Anglən' noxxe'e to barser de or gan' yo'o de'e zan yal na' bcuase'en lao yi' ya'alj de'en žia lao mesən'. Bene' ca' par nič Diozən' gwle'ine' žen che yalən' catə' beṇə' chso'one' orasyonṇə' beṇə' ca' bagwlej Diozən' par zjənaque' lažə' ne'enə'. <sup>4</sup>Na' lao gwyas žen che yalən' de'en noxxə' anglən' gwle'i Diozən' len catə' gwso'on beṇə' ca' orasyonṇə'. <sup>5</sup>Nach anglən' gwxi'e ya'alj de'en žia lao mesən' gwlo'en lo'o barserən' na' bzale'en lao yežlyon' na' gošj gwtin, na' goc bichlə sšag xen, gwyep yes, na' gwxo'.

### Trompet ca'

<sup>6</sup>Nach angl ca' gažə, beṇə' ca' zjənoxxə' trompet ca', bosə'ozo'en cho'aga'aque'enə' par bosə'ocueže'en.

<sup>7</sup>Angl nechən' bcueže' trompet che'enə'. Na' beyož bcueže'ennə' gwche'echgua yej de'en nchixə yi' na' chen lao yežlyon'. Na' yo de'en de lao yežlyon' casi gašjən

gw̄ziayi'in tant gwyeyən, na' yag ca' zjəze lao yežlyon' casi gašjə de'e ca' gosə'əbiayi'in, na' yoguə'əloł yixə' ga' chi' lao yežlyon' gosə'əbiayi'in.

<sup>8</sup>Na' angl əgwchopen' catə' bcueže' trompet che'enə' to de'en naquə ca to ya'a xen bxopən lo'o nisdə'onə' chəł'ənnən, na' casi gašjə nisdə'onə' beyaquən chen.

<sup>9</sup>Na' casi gašjə bia ca' ža' lo'o nisən' gwsə'atəb, leczə gosə'əbiayi' casi gašjə barcw ca' de'e chaš lao nisən'.

<sup>10</sup>Nach angl əgwyonən' bcueže' trompet che'enə' na' to beljw xen de'en žia le'e yoban' bxopən chəł'ənnən ca to yi' yech. Na' bxopən lo'o nis che zan yao ca' na' bej ca'. <sup>11</sup>Na' beljon' nzi'in De'e Zla'. Na' lo'o nis ca' gan' jəchazənnə' besyə'əyacuən zla', na' beņə' zan gwsə'at por ni che de'en gwse'ejə' nisən'.

<sup>12</sup>Nach angl əgwdapən' bcueže' trompet che'enə' na' casi gašjə bgüižən' beyaquən žchəł, na' leczə casi gašjə bio'onə' beyaquən žchəł, na' leczə ca' gwsə'ac casi gašjə beljw ca'. Na' de'e na'anə' part ca' de'en besyə'əyac žchəł bito bosə'əse'eni'in teža na' ni še'elə.

<sup>13</sup>Nach ble'ida' chda to angl lao be'enə' gwchəł yoban' na' benda' gwne' zižjo gwne': —Probchguaza beņə' ca' ža' lao yežlyon', ca naquən' gac chega'aque' catə' yoso'ocuež trompet che angl ca' yešə.

**9** Nach angl güeyə'enə' bcueže' trompet che'enə' na' to angl beņə' zo yoban' ble'ida' betje' lao yežlyon' ca to beljw. Na' le' yo'o lao ne'e saljue' yech gabilən'.

<sup>2</sup>Na' bsaljue' yech gabilən' na' gwyaschgua žen lo'o yechən' can'

chas ženə' catə' chəsə'əbeque' yi' xen lo'o orn. Na' ženə' de'en gwyas lo'o yech gabilən' bcuašə'n bgüižən' can' chac catə'n chilichgua žen dao'. <sup>3</sup>Na' gan' gwyas ženə' besə'əchoj bišə' zan gwyasəb lao yežlyon'. Na' bišə' ca' gwsə'omb znia can' chso'on bəxgoni bian' chsa'aš lao yežlyon'.

<sup>4</sup>Na' Diozən' bene' mendad cui sa'ob yixə' ga' o bi de'en zjənazə' na' ni yag ca', sino yesə'əyižəb beņə' ca' cui nyišə' sey che Diozən' lao xgaga'aque'enə'. <sup>5</sup>Bito be'e latjə so'otəb lega'aque' sino gwyasəb gueyə' bio' gwsə'omb par besə'əžaglaochgüe'. Na' beņə' ca' gosə'əyižəbən' besə'əžaglaochgüe' can' chžaglaochə catə' chyiž bəxjoni'in chio'o. <sup>6</sup>Na' catə' əžin ža gaquə can' ble'idaogüe'eda'anə' beņə' ca' ža' yežlyon' yesə'ənablaže'e sa'ate', pero bito sa'ate', na' se'enene' cuich nite'e, pero bito yesyə'əželene' nac so'one'.

<sup>7</sup>Na' quinga zjənaquə bišə' ca' ble'ida', zjənaquəb ca cabey bia žja'ac lao gwdiłə. Nach yichjga'acquəbən' zo de'e naquə ca coron de or. Na' cho'alaoga'acquəbən' ble'ida'an ca cho'alao beņəch. <sup>8</sup>Na' zjəžiab yišə' de'en naquə ca yišə' yichj no'olə, na' leyga'acquəbən' zjənaquən ca ley leon. <sup>9</sup>Na' cuerp chega'acquəbən' zjənazjən de'en naquə ca de'e ya de'en chcuasə' chcue'ej lega'acquəb. Na' sšag de'en chso'omb len xilə'əga'acquəbən' nenən ca sšag de'en chso'on zan cabey catə' chsa'acdob chja'acquəb lao gwdiłən' zjənxobəb caretən'.

<sup>10</sup>Na' xbanga'acquəbən' zjənaquən ca xban bəxgoni nich bosə'ochimb

len gosə'yəyžəb beṇə' lao gueyə' bio'onə'. <sup>11</sup>Na' angl bzelaο de'en chnabia' gabilən' leczə chnabia'an bišə' ca', lenṇə' nzi' Abadon dižə' ebreο na' leczə nzi'in Apolion dižə' griego, zeje dižə' "chžiyai'in".

<sup>12</sup>Bagwde de'e mal nechən' na' ze'e za'ac yechopən.

<sup>13</sup>Nach angl əgwɔpe bcueže' trompetən' na' benda' gwne angl ben' zecha cho'a mes de orən' de'en zo lao Diozən' mes de'en žia lozei dap squinte gan' chso'elaogüe'e Diozən'. <sup>14</sup>Na' anglən' bolgüiže' angl əgwɔopen' ben' noxə' trompetən', gože'ene': —Bosež angl bzelaο ca' tap de'e ca' zjənchej cho'a yao xen de'en nzi' Eofrates.

<sup>15</sup>Nach anglən' boseže' angl bzelaο ca' tap par ničh gwsə'otən casi gašjə beṇəchən'. Diozən' bito be'e latjə sa'aš angl bzelaο ca' antslə. Bzague'e lega'quən par bi izən', na' bi bio'onə' na' bi žan' na' bi orən' gone' mendad sa'ašən. <sup>16</sup>Na' gwṇezda' nitə' čhopə gueyoa millon soldad čhega'quən de'en zjžia cabey.

<sup>17</sup>Na' quinga ble'idaogüe'eda' cabey ca' na' de'e xio' ca' zjžia cožə'əga'quəbən'. De'e xio' ca' zjənazjən to ya de'e chcuasə' chcue'ej cho'alcho'oga'quən na' yan' naquən de šonə color, de'e xṇa, de'e asol na' de'e gašə'. Na' yičhj cabey ca' zjənaquən ca yičhj leon, na' cho'aga'quəbən' chchoj yi' na' len žen na' len sofr de'en chalə'əṇin. <sup>18</sup>Na' casi gašjə beṇəchən' gwsa'ate' por ni čhe yi' na' žen na' sofr de'en besə'əchoj cho'a cabey ca'. <sup>19</sup>Boso'očhimb cho'aga'quəbən' par gwsə'otəb

beṇə' na' leczə ca' xbanga'quəbən', la' xbanga'quəbən' zjənaquən ca beḷ, zjənsa'an yičhjei par ničh gwsa'on beṇə'.

<sup>20</sup>Na' beṇə' ca' besyə'əga'an cui gwsa'at catə'ən gwyaš cabey ca' lao yežlyon', bitoczə besyə'ədiṇjene' de'e malən' chso'one' ca naquən' chso'elaogüe'e de'e xio' ca' na' chse'ejni'alaže'e lgua'a lsaquə' de or, de pḷat, de brons, de yej na' de yag. Na' lgua'a lsaquən' chse'ejni'alaže'enə' bito chəsə'əle'in, nic chse'enen, na' nic chac yoso'ota cuinga'aquei. <sup>21</sup>Na' bitoczə besyə'ədiṇje beṇə' ca' besyə'əga'əṇən' čhe de'e malən' chso'one'enə' ca naquən' chso'ote' beṇə', na' ca naquən' chəsə'ənaogüe' de'en chso'on beṇə' goža' ca', na' choso'ožə' xtoga'aque' na' chso'one' bitə'tezəchlə de'e yeḷə' zto' de'en zjənac ca', na' chəsə'əbane' bi de čhe beṇə'.

### Angl ben' noxə' librən'

**10** Nach ble'ida' yeto angl gual, gwze'e yoban' betje' lao yežlyon' to lo'o bejw. Na' gwyečhj to yitə' yičhje'enə'. Na' cho'alaogüe'enə' gwnatitən can' chna bgüižən' na' ṇi'e ca' ble'ida'an ca yag bye de'en chalə'əṇin. <sup>2</sup>Anglən' noxe'e to libr dao' de'en nyaljo na' ṇi'e ličan' bsoe'en lao nisdə'onə' na' de'e yeglən' lao yežlyon'. <sup>3</sup>Na' bisye'e zižochgua can' chosya'a leon ca', na' catə' bisye'enə' gošj gwtin gaž las. <sup>4</sup>Na' ca naquə dižə' de'en benda' lao gošj gwtinṇə' bazon gwwoja'an catə'əczla to beṇə' zo yoban' gwne' nada': —Bito gwwojo' dižə' de'en

bendo' lao gošj gwtinnə', con  
gwdapən lo'o yichjla'aždaogo'onə'.

<sup>5</sup>Nach anglən' ben' zo šla'a ni'enə'  
lao nisdə'onə' na' yešla'an lao  
yežlyon', gwliis ne'e lichan' yobalə

<sup>6</sup>na' bzoe' Dioz ben' zo zejlicane  
testigw de que cho'e dižə' li, Dioz  
ben' ben beṇəch, bene' bia ca' ža',  
na' len bitə'ətezəchlə de'e zjəde  
yoban', lao yežlyon' na' lo'o nisən'.  
Gwne': —Bitoch cuezə Diozən'  
par gone' can' bžie' bia' gone'.

<sup>7</sup>Catə' angl gažən' solao əgwcueže'  
trompet che'enə' cana'achən' gaquə  
complir de'en nžia Diozən' bia'  
gaquə ca naquən' babzejni'ine'  
profet che' ca' beṇə' ca' gwso'elao'  
le', bzejni'ine' lega'aque' de'enə'  
cuinə' se'ejni'i beṇə' yeziquə'əchlə.

<sup>8</sup>Na' ben' zo yoban' be'elenche'  
nada' dižə' de'e yoblə gwne': —Jəxi'  
libr da'onə' de'en nyaljo de'en noxə'  
anglən' ben' zecha zo šla'a ni'enə'  
lao nisdə'onə' na' de'en yešla'a lao  
yežlyon'.

<sup>9</sup>Nach gwyə'a gan' zecha anglən' na'  
gwṇaba' libr da'onə'. Na' anglən' gože'  
nada': —Beṇə'ən na' gwdaon. Na' lo'o  
cho'onə' gaquədo'on zix ca ši'in bia  
ser, pero lo'o li'onə' yeyaquən zla'.

<sup>10</sup>Na' gwxi'a libr da'onə' noxə'  
anglən' na' gwdaogua'an. Na' lo'o  
cho'anə' goquən zix ca ši'in bia ser,  
pero beyož gwdaogua'annə' beyaquən  
zla' lo'o li'anə'. <sup>11</sup>Nach anglən' gože'  
nada': —De'e yoblə cheyalə' go'o dižə'  
nac gaquə che zan yež, na' che zan  
nasyon, na' che beṇə' chsa'ac gwde  
gwdelə dižə', na' che zan rei.

### Chopə testigw

**11** Nach Jeso'osən' beṇə' nada'  
to ya de'e gwchixəda'

yo'onə' na' gože' nada': —Žjəxi'o  
medid che yo'odao' əblao che  
Diozən' na' che mesən' gan'  
cho'ela'ochone', na' gwlabo'  
balə beṇə' chso'elaogü'e'ene'.

<sup>2</sup>Pero bito si'o medid chy'onə',  
chedə' naquən par beṇə' ca' cui  
chso'onliləžə' Diozən', na' beṇə' ca'  
cui chso'onliləžə' le' so'onchene'  
syoda che'enə' con nac chse'enene'  
lao yečopəyon bio'. <sup>3</sup>Ese'la'a čopə  
testigw čhia' so'e xtižə'anə' tml  
čopə gueyoa gyon ža. Na' sa'aze'  
lachə' gasj.

<sup>4</sup>Testigw ca' čopə  
gwxaquə'əlebəga'aque'enə' ca  
yag olibo ca' čopə de'en zo lao  
Xancho Diozən' na' ca candelər ca'  
čopə de'en zjəzo laogü'e'enə'. <sup>5</sup>Na'  
notə'ətezə beṇə' yene'e gon mal len  
lega'aque' əchoj yi' cho'a testigw ca'  
na' əgwzeyən beṇə' ca' so'on ca'. Ca'  
gaquə əsa'at beṇə' ca' šə bi so'onene'  
testigw ca'. <sup>6</sup>Na' testigw ca' naquən  
lao na'aga'aque' so'one' ca cui  
gaquə yejw yedote lao so'e xtižə'  
Diozən', na' naquən lao na'aga'aque'  
so'one' ca yeyac nis ca' chen, na'  
lecəzə naquən lao na'aga'aque'  
so'one' ca gaquə bitə'ətezəchlə  
de'e mal de'en se'enene' gaquə.  
<sup>7</sup>Na' catə' yeyož əso'e xtižə'anə'  
cana'ach əchoj lo'o yech gabilən'  
to de'e xio' de'en naquə ca to bia  
znia na' əxitə'ən nizən lega'aque'  
na' gotten lega'aque'. <sup>8</sup>Na' cuerp  
čhega'aque'enə' yega'anən šonə  
ža šgobiž lao lquey syoda əblaonə'  
gan' gwso'ote' nada' naca' Xanle.  
Na' syodan' gan' gwso'ote' nada'  
gwxaquə'əleben ca syoda Sodomān'  
na' ca nasyon Egipton'. <sup>9</sup>Na' lao  
šonə ža šgobiž yesə'əžag beṇə'

zjənaquə zan nasyon, beṇə' za'ac  
 zan yež, beṇə' zjənaquə zan dia  
 na' chsa'aque' gwde gwdele dižə,  
 desə'əgüie' de'e beṇə' guat ca' zjəde'  
 lao lqueyən' na' bito so'e latjə no  
 əgwcuəšə' lega'aque'. <sup>10</sup>Na' beṇə' ca'  
 ža' lao yežlyon' yesyə'əbeine' catə'  
 bagwsa'at testigw čhia' ca', tant  
 zed əgwsa'aquene' xtiža'anə' de'en  
 gwsə'elene' lega'aque'. Nach so'one'  
 legr, na' yoso'onežjo ljuəžjga'aque'  
 no regal. <sup>11</sup>Nach ble'idaogüie'eda'  
 goc doxen can' gwne'enə'. Na'  
 catə' goc šonə ža šgobiž gwsa'at  
 testigw ca', cana'ach Diozən'  
 bosbane' lega'aque' na' gosə'əzeche'  
 de'e yoblə. Na' yoguə' beṇə' ca'  
 besə'əle'i can' besyə'əban testigw  
 ca' besə'əžebchgüie'. <sup>12</sup>Nach testigw  
 ca' čhopə gwsə'enene' gož Diozən'  
 lega'aque' zižjo: —Le'e yeda, le'e  
 yeyep nga.

Nach besyə'əyepə' yoban' to  
 lo'o bejw, na' besə'əle'i beṇə'  
 contr čhega'aque' ca'. <sup>13</sup>Na' ca  
 orən' lechgualə gwxo' na' gwžiyai'  
 to part syodan' na' gaža mil  
 beṇə' gwsa'ate' catə'an gwxo'.  
 Na' beṇə' ca' besyə'əga'an cui  
 gwsa'ate' lechgualə besə'əžebe' na'  
 gwsə'ela'ogüie'e Diozən' ben' zo  
 yoban'.

<sup>14</sup>Bagwde de'e mal əgwchopen'  
 na' ze'e gaquə de'e əgwyonen'.

**Can' goquə catə' angl beṇə' gažən'  
 bcueže' trompet čhe'enə'**

<sup>15</sup>Nach angl beṇə' gažən' bcueže'  
 trompet čhe'enə' na' beṇə' ca' ža'  
 yoban' gosə'əne' zižjo gosə'əne':  
 Xancho Diozən' na' Xi'ine'  
 Cristən' bagwsə'one' ca zo  
 gwxiye'enə' xni'aga'aque'enə',

na' lega'acze'enə' yesə'ənabile  
 beṇə' ža' yežlyon' zejlicane.

Crist na'anə' gwlej Diozən' par  
 chaclene' beṇə'chən'.

<sup>16</sup>Nach beṇə' golə beṇə' blao  
 ca' tapechoa, beṇə' ca' zjəchi'  
 chəsə'ənabilia'alene' Diozən',  
 besə'əzo xibga'aque' laogüie'enə'  
 na' besə'əchequə' yichjga'aque'en  
 lao yon' gwsə'elaogüie'e Diozən',  
<sup>17</sup>gosə'əne':

Čončto' yełə' choxwlen čchio',  
 Xanto'.

Len' naco' Dioz ben' napə  
 le'ezelaogüie yełə' guac xen.  
 Bazoczə' catə'an bxi'o yežlyon',  
 na' ca'aczən' so' catə'an yeyož  
 yedon.

Na' len yełə' guac čchio'onə'  
 chnabi'o.

<sup>18</sup>Beṇə' nasyon ca' ža' yežlyon'  
 besə'əže'e le',  
 pero na'a babžin ža əgwnežjo'  
 castigw čhega'aque'.  
 Babžin ža əchoglaogo' čhe  
 yoguə' beṇə' bagwsa'at šə non'  
 napə dołə'.

Na' gwnežjo' yełə' bala'an čhe  
 beṇə' ca' gwsə'on xšino'onə'  
 ca de'en gwsə'e xtižo'onə',  
 na' len yeziquə'əchlə beṇə'  
 ca' bagwlejo' par zjənaque'  
 lažə' na'onə' na' gwsa'ape' le'  
 respet.

Egwnežjo' lega'aque' yełə'  
 bala'an la'anə'əczə šə  
 gwsa'aque' beṇə' blao o  
 la'anə'əczə šə cui gwsa'aque'  
 beṇə' blao žlac gosə'ənite'e  
 yežlyon'.

Le'czə gono' par nič beṇə' ca'  
 chosə'ožiyai' ljuəžjga'aque' o  
 chsə'one' bichlə de'e mal lao



yežlyon' əsa'aque' castigw lao  
yi' gabilən'.

<sup>19</sup>Nach ble'ida' nla'axejə gan'  
chso'elaogü'e Diozən' yoban' na'  
ble'ida' caj gan' ža' de'en nyoj  
can' ben Diozən' mendad so'on  
benə' Izrael ca' par ničh gaquəlene'  
lega'aque'. Na' lao ble'ida' de'e  
ca' gwyep yes, gocchgua sšag na'  
gošj gwtin, na' leczə gwxo' na'  
gwche'echgua yejən'.

### No'olən' na' gwxiye'enə'

**12** Na' ben Diozən' par ničh  
ble'ida'ogü'eda' le'e  
yoban' to de'e zaquə' yebanecho,  
ble'ida' to no'olə nyaze' bgüižən'  
ca xe'. Na' zeche' lao bio'onə' na'  
yichje'enə' zon to coron de šizīn  
beljw. <sup>2</sup>No'e bdao' na' bachaque'  
bes che yelə' sannə' na' bisye'e  
tant chžaglaogü'e lao chzane'enə'.  
<sup>3</sup>Na' ble'idaogü'eda' yeto de'e  
zaquə' yebanecho le'e yoban',  
ble'ida' gwxiye'enə' beyaquən to  
bel gaž yichj bia xen na' bia xna,  
na' žia ši lozəb na' tgüejə coron  
nitə' yichjəb ca'. <sup>4</sup>Na' cata' gwda  
xbambən' bchinjən casi gašjə  
beljw ca' zjəžia le'e yoban' na'  
besə'əyinjən lao yežlyon'. Nach  
belən' bian' beyaque gwxiye'enə'  
gotə'əb xni'a no'olən', gwlezəb par  
šebəb bda'onə' cata' sane'ebonə'.  
<sup>5</sup>No'olən' gwthane' to bi'i byo, bi'i  
nabia' yoguə' nasyon. Na' gombo'  
ca' yoso'ozexjw yichj benə' nasyon  
ca' yoso'ozenague' chebo'. Diozən'  
bezi' beque'ebə' beche'ebə' gan'  
chi'e chnabi'enə'. <sup>6</sup>Nach no'olən'  
boxonjene' gwxiye'enə' par šejə' to  
latjə gan' cui no ža' gan' banonšao'  
Diozən' par so no'olən', na' lao soe'

na' Diozən' gone' le' mantener tmil  
chopə gueyoa gyon ža.

<sup>7-8</sup>Gwde na' goc gwdilən' yoban',  
na' angl əblao ben' le Miguel na'  
soldad che' ca' gosə'ədiləlene' belən'  
bian' beyaque gwxiye'enə'. Na'  
gwxiye'enə' na' angl bzelayo chei ca'  
bito gosə'əzoin anglən' len soldad  
che' ca'. Besyə'əbeje' lega'aguən  
yoban' na' bitoch chso'e latjə  
žjəya'acquəchən yoban' de'e yoblə.  
<sup>9</sup>Na' bosyo'ozalə'e gwxiye'enə' len  
angl bzelayo chei ca' lao yežlyon'. Ca'  
goc che de'en beyaque bel xennə',  
de'en le Satanas. Zon dezd catə'ən  
gwxe yežlyon' chxoayaguən yoguə'  
benəch.

<sup>10</sup>Nach benda' to benə' zo yoban'  
gwne' zižjo gwne': —Bach bžin  
ža bosla Diozən' benəchən' lao na'  
gwxiye'enə' len yelə' guac de'en  
nape'enə' na' chnabi'e lega'aque'.  
Na' babžin ža chi' Cristən'  
chnabia'alene' Diozən', Crist nan'  
bsele'e par goclene' benəchən'.  
Babesyə'əbeje' gwxiye'enə' de'en  
bcuiš benə' bišə'əcho ca' lao  
Diozən' do ža do yel nan de  
que de xtolə'əga'aque', na' na'a  
baboso'ozalə'en lao yežlyon'. <sup>11</sup>Benə'  
bišə'əcho ca' benə' ca' bagwsa'at,  
gosə'əzoinə' cui bosə'ozenague' che  
gwxiye'enə' lao gosə'ənite'e chedə'  
gwso'onlilaže'e Jesocristən' ben'  
blalj xchene'enə' por ni checho.  
Na' leczə gosə'əzoinə'en chedə'  
gwso'e dižə' de que chso'onlilaže'e  
Jesocristən'. Gwsa'acbe'ine' yejni'a  
sa'ate' cle ca yesə'əbejyichje'  
Jesocristən' ben' gwxaquə'əlebe ca  
xilə' dao' ca' gwso'ot benə' Izrael  
ca' par gwnitlao xtolə'əga'aque'enə'.  
<sup>12</sup>De'e na'anə' ledoyebei chio'o

zocho yoban'. Probchguazə  
 beṇə' nitə' doxen lao yežlyon'.  
 Probchguazəga'aque' čhedə'  
 babžin gwxiye'enə' gan' nite'enə'.  
 Lechguale čžā'an de'en chega'an  
 yetozə tyemp dao' par gonən  
 can' chene'ennə' na' de'e na'anə'  
 gonchguan contr beṇačhən'.

<sup>13</sup>Na' beṇən' bian' beyaque  
 gwxiye'enə' catə' gocbe'ib de  
 que babesyə'əbeje'eb yoban'  
 na' babžimb lao yežlyon', nach  
 belagdob no'olən' ben' gwxa  
 bi'i byo da'onə'. <sup>14</sup>Pero Diozən'  
 goclene' no'olən', bene' ca gwzo  
 čhopə xile'e de'e xen caczə čhe to  
 bsia dao' par ničh cui gwxa beṇən'  
 le'. Na' gwzoe' bžinte' latjə dašən'  
 gan' banonšao' Diozən' soe' na' gan'  
 gone' le' mantener šon iz yo'o gašjə.  
<sup>15</sup>Nach bchoj nis zil cho'a beṇən'  
 caczə to yao la' gone'eb əžinten gan'  
 zo no'olən' par gua'an le'. <sup>16</sup>Pero na'  
 Diozən' goclene' no'olən', bene' par  
 ničh yežlyon' güe'ejən nisən' de'en  
 bchoj cho'a beṇən'. <sup>17</sup>Na' beṇən'  
 bžā'achguab no'olən' nach jəyemb  
 contr xi'ine' ca' yeṇa', beṇə' ca'  
 chso'on can' non Diozən' mendad  
 goncho, beṇə' ca' leczə chso'e dižə'  
 de que chso'onlilažə'e Jeso'osən'.

### Čhopə bež bia əznia

**13** Na' gwzecha' cho'a  
 nisdə'onə' na' ble'ida' bchoj  
 to bež əznia lo'o nisdə'onə'. Na' nitə'  
 gažə yičhjəb na' žia ši lozəb na' lao  
 to to lozəb ca' nitə' tgüejə coron.  
 Na' lao to to yičhjəb ca' nyoj to la  
 de'en chloe' de que chon cuimb ca  
 Dioz. <sup>2</sup>Ble'ida' bežən' ca to tigr na'  
 ble'ida' ni'ana'ab ca' zjənaquən ca  
 ni'ana' os, na' cho'abən' naquən ca

cho'a leon. Na' beṇən' bian' beyaque  
 gwxiye'enə' bemb par ničh gwnabia'  
 bežən', na' bnežjw beṇən' leb yeṇə'  
 guac par ničh bemb ca gosə'ənitə'  
 yoguə'əloṇ beṇačh xni'abən'.

<sup>3</sup>Na' ble'ida' to yičhj bežən'  
 naquəchguan güe', na' naquən ca  
 to de'e gatlemb pero bito gotəb. Na'  
 yoguə'əloṇ beṇə' besyə'əbanene'  
 de'en beyaquebən' na' gwnitə'əcze'  
 xni'abən'. <sup>4</sup>Na' gwso'elaogüe'e  
 beṇən' bian' beyaque gwxiye'enə',  
 gwsa'acbe'ine' de que beṇən'  
 bemb par ničh chnabia' bežən'.  
 Na' leczə gwso'elaogüe'e bežən',  
 gosə'əne': —Bež nga chnabi'achəb  
 ca notə'ətezəchlə beṇə', na' notono  
 no soi tiṇəlen leb.

<sup>5</sup>Na' bežən' be'eb dižə' de que  
 naquəb ca Diozən' na' be'eb  
 bichlə dižə' bžia bnitə'əb Diozən'  
 lao čopeyon bio' gwnabi'ab.  
<sup>6</sup>Gwnechguab contr Diozən',  
 bžia bnitə'əb le' na' leczə bžia  
 bnitə'əb yoban' na' len beṇə' ca'  
 ža' na'. <sup>7</sup>Na' gwyo'o lao na' bežən'  
 gwdiṇəlemb beṇə' ca' bagwlej  
 Diozən' par zjənaque' lažə' ne'enə'  
 na' bzob lega'aque' xni'abən' par  
 bčhi' bsaquə'əb lega'aque'. Nach  
 gwnabi'ab beṇačhən' yoguə'  
 nasyon yoguə' yež, yoguə' dia na'  
 yoguə' beṇə' chso'e gwde gwdeṇə'  
 dižə'. <sup>8</sup>Na' yoguə' beṇə' ca' cui  
 zjənyoj laga'aque'ena' le'e libr čhe  
 Jesocristən' gwso'elaogüe'eb. Catə'n  
 ze'e xə yežlyon' banyoj la beṇə' ca'  
 zjənapə yeṇə' mban zejlicəne le'e libr  
 čhe Jesocristən' ben' gwxaquə'əlebe  
 ca xilə' dao' ca' gwso'ot beṇə' Izrael  
 ca' par gwnitlao xtoṇə'əga'aque'ena'.  
<sup>9</sup>Le'e žia nagle de'e chene  
 legwzenag de'e nga. <sup>10</sup>Beṇə'

ca' choso'ozo beṇə' yoblə  
xni'aga'aque'enə' ca pres o ca  
esclabos, can' chso'one' ca' gac  
çhega'aque'. Na' beṇə' ca' chso'ot  
beṇə' len yes ya, læczə can' sa'ate'.  
De'e na'anə' chonən byen sotezə so  
chio'o bagwlej Diozən' par naccho  
lažə' ne'enə' gonlilažə'açhone'  
bitə'atezə chac çhecho.

<sup>11</sup>Na' ble'ida' yeto bež bchojəb  
lɔ'o yon'. Na' bežən' žia çhopə lozəb  
ca loz xilə' dao' pero be'eb dižə'  
goxoayag can' chon beḷən' bian'  
beyaue gwxiye'enə'. <sup>12</sup>Na' bežən'  
bian' ble'ida' de'e neche bemb par  
niç bež əgwchopen' gwnabia'ab  
lao leb na' bnežjəb leb doxen yeḷə'  
gwnabia' de'en gwdapəbən'. Nach  
bia əgwchopen' bemb par niç beṇə'  
ca' ža' yežlyon' gwsə'elaogüe'e bia  
nechən' bian' naquə güe' yichjeinə',  
güe' de'en goquə ca to de'e gatlemb.  
<sup>13</sup>Na' bia əgwchopen' bemb de'e  
zan de'e zaquə' yesyə'əbançgüei  
beṇə', xte bemb par niç beṇəçhən'  
besə'əle'ine' yi' le'e yoban' na'  
betjən lao yežlyon'. <sup>14</sup>Na' laogüe  
de'en bemb de'e besyə'əbanene'enə'  
lao bež nechən', bxoayaguəb  
beṇə' ža' yežlyon' par niç ca'  
gwsə'elaogüe'e bia nechən' bian'  
goquə güe' yichjəbən' len yes yanə',  
güe' de'en bašə gatlemb. Na' bež  
əgwchopen' bemb mendad par  
gwsə'one' to lgua'a lsaquə' bež  
nechən'. <sup>15</sup>Na' goquən lao na' bež  
əgwchopen' bemb par niç gwyo'o  
lgua'a lsaquə' bež nechən' biš xne.  
Na' lgua'a lsaquə'əənə' be'eczən dižə'  
na' benən ca gwsə'ote' beṇə' ca' cui  
gwsə'elao' len. <sup>16</sup>Na' læczə benən  
byen par niç goso'ozo yoguə' beṇə'  
señy çhe bežən' na'aga'aque' licha

o lao xgaga'aque', beṇə' blao na'  
la'anə' beṇə' cui zjənaquə blao, na'  
la'anə' beṇə' gwni'a o beṇə' yašə',  
na' la'anə' beṇə' zjənaquə esclabos  
o beṇə' cui zjənaquə esclabos.

<sup>17</sup>Bitobi bi goquə so'ote'e na' nic  
goquə bi yesə'əzi'e šə cui zjəzoe'  
señy çhe bežən' o šə cui zjəzoe'  
numero de'en zejən labən'. <sup>18</sup>Na'  
nga de to yeḷə' sin' de'e əgwzejni'in  
chio'o çhe bežən', na' šə no  
chejni'in cheyaḷə' gwlabə' numero  
çhebən'. Na' numero çhebən'  
naquən can' chlab chio'o beṇəçh,  
xop gueyoa gyon xop.

De'en gwsə'ol beṇə' ca' to gueyoa  
tapeyon mil gwsə'elaogüe'e Diozən'

**14** Nach bgüia' na' ble'ida'  
Jesocristən' ben'  
gwxaquə'əlebe ca xilə' dao' ca'  
gwsə'ot beṇə' Izrael ca' par  
gwnitlao xtolə'əga'aque'enə', zeche'  
lao ya'a Sionnə' len togueyoa  
tapeyon mil beṇə' yoblə. Na' nyoj  
le'enə' na' len la Xə' Diozən' lao  
xga beṇə' ca'. <sup>2</sup>Na' benda' chso'ol  
beṇə' zan beṇə' ža' yoban'. Na'  
benda'an ca chsiž catə' dechgua  
yaon' na' ca nen catə' læchgualə  
chnin, na' benda' nenən can' chol  
arpan' catə' chəsə'əgole' de'e zan  
tšil'izə. <sup>3</sup>Na' benda' chso'ole' to  
imno cobə lao Diozən' gan' chi'e  
chnabi'enə' gan' nitə' bia ca' tap na'  
beṇə' golə blao tapechoa ca'. Pero  
beṇə' ca' to gueyoa tapeyon mil  
na'azə goc bosə'osedə' imnon' par  
gwsə'ole'en. Beṇə' ca'anə' zjənchoje'  
entr beṇəçhən' chse'ejle'e de que  
Jesocristən' gwdixjue' xtolə'əchon'.  
<sup>4</sup>Beṇə' ca' chsa'aquene' çhe  
tozə Jesocristən', na' de'e na'anə'

gwxaquə'əlebəga'aque' ca  
 beṇə' cui chgo'o xtoi. Beṇə' ca'  
 chso'one' con can' na Jesocristən'  
 ben' gwxaquə'əlebe ca xilə' dao'  
 ca' gwsot'ot beṇə' Izrael ca' par  
 gwnitlao xtolə'əga'aque'enə'.  
 Lega'aque'en zjənchoje' entr  
 beṇəchən' chse'ejle'e de  
 que Jesocristən' gwdixjue'  
 xtolə'əchon'. <sup>5</sup>Chso'e por dižə' li,  
 na' bitobi bi de'e mal da əchen  
 yichjla'ažda'oga'aque'enə'.

### De'en gosə'əna šonə angl

<sup>6</sup>Nach ble'ida' yeto' angl gwchol  
 yoban' chde' lao be'. Gwdixjue'ine'  
 beṇə' ža' yežlyon' to dižə' güen  
 dižə' cobə che Diozən' de'e zaquə'  
 zejlicane. Na' gwdixjui'en len  
 beṇə' zjənaquə to to nasyon, to  
 to yež, to to dia, na' beṇə' chso'e  
 gwde gwdele dižə'. <sup>7</sup>Gwne' zižjo  
 gože' lega'aque': —Le'e gapə  
 Diozən' respet, le'e güe' Diozən'  
 yełə' bala'an, chedə' babžin or gone'  
 castigw beṇə' ca' cui chso'elao' le'.  
 Le'e güe'elao' Diozən' ben' ben  
 yoban', yežlyon', nisdə'onə' na' bej  
 ca'.

<sup>8</sup>Na' gwde na' bchoj yeto angl,  
 na' gwne': —Bač bžin ža cuiayi'  
 syoda Babilonian' la' beṇə' gwnabia'  
 ca' ža' syodan' bagwso'one' par  
 nič beṇə' ca' ža' yoguə' nasyon  
 ca' choso'ozoe' Diozən' ca'alə cuich  
 chso'elaogüe'ene'.

<sup>9</sup>Nach gwde na' bchoj angl  
 əgwyone, na' leczə gwne' zižjo  
 gwne': —Notə'ətezə beṇə' chso'elao'  
 bežən' na' lgua'a lsaquə' de'en  
 naquə ca leḅ na' notə'ətezə  
 bagwso'e latjə boso'ozoe' seņy  
 che bežən' lao xgaga'aque' o

na'aga'aque', <sup>10</sup>lega'aque'enə' gon  
 Diozən' castigw gual zejlicane tant  
 chž'e che de'e malən' chso'one'.  
 Yesə'əzaquə'əzi'e gan' chalə' yi'  
 na' sofr. Na' angl che Diozən' na'  
 Jesocristən' ben' gwxaquə'əlebe ca  
 xilə' dao' ca' gwsot'ot beṇə' Izrael  
 ca' par gwnitlao xtolə'əga'aque'enə'  
 yesə'əle'ine' can' gac che beṇə'  
 ca'. <sup>11</sup>Na' chas žen che yi'inə'  
 gan' yesə'əžaglaogüe' zejlicane,  
 na' do ža do yel bito bi dezcanz  
 gatə' chega'aque'. Can' gaquə che  
 beṇə' ca' chso'elao' bežən' na'  
 lgua'a lsaquə' de'e naquə ca leḅ  
 beṇə' ca' zjəzo seņy che labən'  
 lao xgaga'aque' o na'aga'aque'.

<sup>12</sup>De'e na'anə' chonən byen sotezə  
 so chio'o bagwlej Diozən' par  
 naccho lažə' ne'ena' goncho can'  
 none' mendadən' na' sotezə socho  
 gonlilažə'əcho Jeso'osən'.

<sup>13</sup>Na' benda' to beṇə' zo yoban'  
 gože' nada': —Bzoj de que dez  
 na'a beṇə' ca' chso'onlilažə' Xancho  
 Jesocristən' nite'e mbalaz catə'an  
 sa'ate'. Bzoj de que Spirit che  
 Diozən' nan de que de'e li nite'e  
 mbalaz chedə' Diozən' gwcueze'  
 de'en gwlo'e lao na'aga'aque' so'one'  
 na' Diozən' əžsa'alaže'e yoguə' de'e  
 güen de'en bagwso'one'.

### Catə' Diozən' yotobe' cwseš che'enə'

<sup>14</sup>Nach bgüia' na' ble'ida' to  
 bejw šyiš le'e yoban' na' chi' Xi'in  
 Diozən' cožə' bejon', naque' ca  
 to beṇəch. Na' zo to coron de or  
 yichje'enə' na' noxe'e to oz de'en  
 nłachgua. <sup>15</sup>Na' bchoj yeto angl lo'i  
 gan' chso'elaogüe' Diozən' yoban'  
 na' gwne' zižjo gože' ben' chi'  
 cožə' bejon': —Babžin or yetobo'

trigw de'en goquə lao yežlyon', la' bagolən. Na' bechoguaən.

<sup>16</sup>Nach ben' chi' cožə' bejon' bechogue' trigon' len ozən' par bezi'e cwsešən'.

<sup>17</sup>Na' bezchoj yeto anglən' gan' chso'elaogü'e Diozən' yoban' na' leczə noxə'e to oz de'en nłachgua.

<sup>18</sup>Nach bezchoj yeto anglən' beñə' zo gan' zo mes gan' chso'elaogü'e Diozən', ben' chapə yi' de'en chalə' lao mesən'. Na' anglən' gwñe' zižjo bolgüiže' angl əgwchopen' ben' leczə noxə' ozən', gož'e'ene': —Bagüe obas ca' de'en žia lao yežlyon'. Bechogga'aquən len oz chio'onə' ničh yetobəga'aco'on.

<sup>19</sup>Nach anglən' bechogue' obas ca' de'en žia lao yežlyon' na' bzale'en lo'o ša' xen de yej gan' choso'osi'en par chechoj xisein'. Na' zejen dižə' de que Diozən' botobe' beñə' ca' cui boso'ozenag che' par benchgü'e lega'aque' castigw. <sup>20</sup>Beñə' zan juisyən' botobe' na' bnežjue' castigw chega'aque'enə', na' tant besə'əžaglaoga'aque' xte ble'ida' xchenga'aque'enə' ca nis oban' de'en boso'osie' lo'o šan' de'en chi' fuerlə syodan'. Na' gwžian de'e zil lao yežlyon', bžinten ca tmetr yo'o gašjə yelə' zitjw na' bšiljon šonə gueyoa kilometros.

Angl ca' gwso'on par ničh  
gotə' gažə castigw de'en  
bseļə' Diozən' le'ezelaogüe

**15** Na' ble'ida' yeto de'e lechguale zaquə' yebanecho le'e yoban', to de'e žialao xen. Ble'ida' gažə angl beñə' naquə lao na'aga'aque' so'one' par ničh gaquə yegažə de'e mal par yeyož əgwlo'e

Diozən' can' chnežjue' castigw che beñə' chso'on de'e malən'.

<sup>2</sup>Na' ble'ida' to de'en naquə ca to nisdəo' de bidr nchixən len yi' na' lao nisdə'onə' zjəzecha beñə' ca' gwso'on gan cui gwso'elaogü'e bežən' na' lguə'a lsaquə' de'e naquə ca leb na' leczə cui gwso'e latjə yesə'ənite'e señy cheb o nomero de'en zejen labən'. Na' beñə' ca' zjənoxe'e tgüejə arpa de'en bnežjw Diozən' lega'aque'.

<sup>3</sup>Na' chso'ole' to imno de'en naquə ca de'en bzejni'i de'e Moisezən' beñə' Izrael ca', Moisez ben' goquə beñə' güen xšin Diozən'. Jesocristən' ben' gwxaquə'əlebe ca xilə' dao' ca' gwso'ot beñə' Izrael ca' par gwnitlao xtolə'əga'aque'enə' bzejni'ine' beñə' ca' ble'ida' ničh chso'ole'en, na' nan:

Xanto' Dioz, le' chono' miłagr  
xen na' bichlə de'e zaquə'  
yebaneto'.

Len' napo' le'ezelaogüe yelə'  
guac xen.

Na' zdaczo' liča na' chono' can'  
na'onə'.

Len' chnabi'o nasyon ca'.

<sup>4</sup>Gwžin ža catə' yoguə' benəchən'  
əsa'ape' le' respet na'  
əso'elaogüe'e le'.

Len' naco' beñə' la'aždao'  
xi'ilažə' juisy.

Na' beñə' ža' yoguə'əlol nasyon  
əso'elaogüe'e le' catə' la'aque'  
laogo'onə',

chedə' babesə'əle'ine' de que  
yoguə'əlol de'en babeno'onə'  
beno'on can' cheyalə' gaquən.

<sup>5</sup>Na' gwde de'e ca' ble'ida'  
nła'axejə gan' chso'elaogü'e  
Diozən' yoban' na' naquən ca yo'o

de lachə' de'en gwso'on beṇə'  
 Izrael ca' latjə dašən' gan' gwzo  
 Diozən' len lega'aque'. <sup>6</sup>Na' angl  
 ca' gažə, beṇə' ca' ble'ida' antslə,  
 besyə'əchoje' gan' chso'elaogüe'  
 Diozən' yoban', beṇə' ca' naquən  
 lao na'aga'aque' so'one' par niçh  
 gaquə gažə de'e mal ca' lao yežlyon'.  
 Na' zjənyaze' lachə' fin de'en naquə  
 de'e šyış xilə' juisy, na' cho'alçho'  
 to toga'aque' zjənyechjən sinš de  
 or. <sup>7</sup>Nach to bia ca' tap bia ca' nitə'  
 lao Diozən' bnežjob angl ca' gažə  
 tgüejə tas de or gan' yo'ožə to  
 de'en gwxaquə'əleben ca castigw  
 gual de'en əgwnežjo Diozən' beṇə'  
 ca' chso'on de'e malən', Dioz ben'  
 zoczə zejlicane. <sup>8</sup>Na' de'e tant chey  
 che'eni' gan' zo Diozən' na' tant  
 yelə' guac xen nape' xte goc ca to  
 ga chas žen gan' chso'elaogüe'ene'  
 yoban'. De'e na'anə' notono no goc  
 šo'o gan' chso'elaogüe'ene' xte que  
 catə'əch beyož goc de'e mal ca'  
 gažə de'en naquə lao na' angl ca'  
 gažə.

Tas ca' gan' yo'ožə de'en  
 gwxaquə'əlebe ca castigw de'en  
 gwnežjo Diozən' beṇə' mal ca'

**16** Nach benda' gwne Diozən'  
 zižjo gan' chso'elaogüe'ene'  
 yoban' gože' angl ca' gažə': —Le'e  
 žja'ac le'e žjəcuasə de'en yo'ožə lo'o  
 tas chele ca' lao yežlyon', la' de'en  
 zjəyo'ožənnə' gwxaquə'əleben ca  
 castigw gual de'en əgwnežjua' beṇə'  
 ca' chso'on de'e malən'.

<sup>2</sup>Nach gwyey angl nechən' jəcuase'  
 de'en yo'ožə lo'o tas che'ena' lao  
 yežlyon' na' yoguə' beṇə' ca' zjəzo  
 señy che bežən' na' chso'elaogüe'  
 lgu'a lsaquə' de'en naquə ca leb

gosə'əbie' to çlas yežə' əzban na'  
 gwlachguan.

<sup>3</sup>Nach angl əgwchopen' bcuase'  
 de'en yo'ožə lo'o tas che'ena' lao  
 nisdə'onə' na' nisdə'onə' beyaquən  
 ca chen che beṇə' guat. Na' gwsə'at  
 yoguə' bia ca' ža' lo'o nisən'.

<sup>4</sup>Nach angl əgwyonən' bcuase'  
 de'en yo'ožə lo'o tas che'ena'  
 lao yao ca' na' bej ca' na' leczə  
 besyə'əyaguən chen. <sup>5</sup>Na' benda'  
 de'en gož anglən' ben' chapə  
 nisən' de'en de lao yežlyon', gože'  
 Diozən': —Xantə' Dioz, len' naco'  
 beṇə' la'aždao' xi'ilažə' juisy. Len'  
 bazoczə' catə'ən bxi'o yežlyon'  
 na' zoczə' na'a. Na' zdaczə' licha  
 ca de'en chnežjo' beṇə' mal ca'  
 castigw quinga de'en chsa'aque'.  
<sup>6</sup>Lega'aque' bagwso'ote' profet  
 ca' beṇə' ca' gwso'e xtižə'onə' na'  
 bagwso'ote' nochlə beṇə' gwlejo'  
 par gwsə'aque' lažə' na'onə'. De'e  
 na'anə' babeno' par niçh əse'eje'  
 nis de'en babeyac chen. Ca'aczən'  
 cheyałə' gac chega'aque'.

<sup>7</sup>Na' benda' yeto angl ben' zecha  
 cho'a mes gan' chso'elaogüe'  
 Diozən' gwne': —Xantə' Dioz, lən'  
 napo' le'ezelaogüe yelə' guac xen.  
 De'e li zdaczə' licha can' chnežjo'  
 castigw che beṇə' mal ca' na' chono'  
 can' na'onə'.

<sup>8</sup>Na' angl əgwdapən' bcuase'  
 de'en yo'ožə lo'o tas che'ena'  
 lao bgüižən' na' benən par niçh  
 bgüižən' bzeyən beṇə'chən'  
 len yi' cheinə'. <sup>9</sup>Lechguale  
 bzeyən beṇə'chən', pero bito  
 besyə'ədinjəne' xtə'ə'əga'aque'ena'  
 par əso'elaogüe' Diozən'. Nachle  
 boso'ožia boso'onite'e Diozən' ben'  
 chon par niçh chəsə'əžaglaogüe'.

<sup>10</sup>Na' angl güeye'enə' bcuase' de'en yo'ožə lo'o tas che'enə' gan' chi' bežən' chnabi'ab na' beyac žchoł doxen gan' chnabi'abən'. Na' beņə' ca' ža' gan' chnabi'abən' gwsa'oya'a ložə'əga'aque'enə' tant besə'əyiya'a cuerp chega'aque'enə'.

<sup>11</sup>Na' bitoczə besyə'ədiņjene' de'e malən' gwsə'one'enə' la'anə'əczə besə'əžaglaochgüe', nachle boso'ožia boso'onite'e Dioz ben' zo yoban' por ni che de'en chse'ey chəsə'əla' cuerp chega'aque'enə' na' por ni che de'en zjəžie' yežə'ənə'.

<sup>12</sup>Na' angl əgwxopen' bcuase' de'en yo'ožə lo'o tas che'enə' lao yao xen de'en nzi' Eofrates na' bebiž nis yaon' na' beyaljo to nez par nič rei ca' za'ac gan' chla' bgüižən' yesə'əžine' gan' gaquə gwdiłən'.

<sup>13</sup>Nach šonə de'e xio' ca' besyə'əyaquən blož. Na' to bložən' ble'ida' bchojəb cho'a bełən' bian' beyaque gwxiye'enə', na' yetob bchojəb cho'a bežən', na' yetob bchojəb cho'a bež əgwchope bian' choe' dižə' goxoayaguən' par nič beņəchən' chso'elaogüe'e bež nechən'. <sup>14</sup>De'e xio' quinga gwso'onən milagr na' jəsə'ətobən yoguə' beņə' ca' chəsə'ənabia' doxenlə lao yežlyon'. Jəsə'ətobən lega'aque' tozə latjə par nič nite'le probnid yesə'ədilələne' Diozən' ben' napə le'ezelaogüe yelə' guac xen catə'ən əžin žan' nžie' bia' yesə'ədilələne'ene'. <sup>15</sup>Nach benda' gwna Xi'in Diozən': —Le'e gon xbab de que nada' yida' əgwnežjua' castigw che beņə' ca' chso'on de'e malən', na' senyala' lega'aque' can' chon to beņə' bguan. Mbalaz sole šə bazole probnid chbezle

nada' catə'ən yida'anə'. Pero šə cuiņə' yediņjele de'e malən' chonle catə'ən yida'anə', gona' ca sa'acbe'i yoguə'əloł beņəchən' ca naquə yoguə' de'e mal ca' babenlen'.

<sup>16</sup>Nach bezle'ida' to latjə gan' nzi' Armagedon dižə' ebreo. Latjən' nzi' ca'anə' əbtob de'e xio' ca' beņə' ca' chəsə'ənabia' lao yežlyon'.

<sup>17</sup>Na' angl gažən' bcuase' de'en yo'ožə lo'o tas che'enə' lao be', na' benda' gwne Diozən' zižjo gan' chso'elaogüe'ene' yoban' gan' leczə chi'e chnabi'e, gwne': —Bač bselə'a yoguə' castigw ca' de'en nžia bia' əselə'a.

<sup>18</sup>Nach gwyep yes, goc sšag, na' gošj gwtin, na' lechgualə gwxo' mazəchlə can' bagwxo' batə'ətezəchlə lao ža' beņəchən' yežlyon'. <sup>19</sup>Na' le'ezelaogüe syoda blaoch de'en chi' lao yežlyon' gwžiai'in goquən šonlə, na' leczə gwžiai' syoda ca' yeziquə'əchlə de'en zjəchi' lao yežlyon'. Diozən' bitoch gwleze' par bnežjue' castigw che de'e malən' bagwso'ontec beņə' ca' chəsə'ənabia' Babilonian' na' de'e na'anə' bnežjue' lega'aque' castigw gual zejlicane tant chže'le che de'e malən' gwso'one'enə'. <sup>20</sup>Na' de'e tant gwxo'ochgua xte benittecə yoguə'əloł islas ca' na' ya'a ca'. <sup>21</sup>Na' leczə gwche'echgua yej ži'a lao yežlyon' na' cha'aga'aguən tapa rob güeje to ton. Besə'əžaglaochgua beņə' ca' ža' yežlyon' na' boso'ožia boso'onite'e Diozən' de'en bene' par nič gwche' yejən'.

**Castigw de'en bnežjw  
Diozən' no'olə sargatən'**

**17** Na' lao angl ca' gažə beņə' ca' gwso'oxə' tas de orən',

toe' gože' nada': —Da gwlo'ida' le' castigw de'en əgwnežjo Diozən' no'olə blao no'olə sargatən' chi' lao nisdao' ca'. <sup>2</sup>Yoguə' beṇə' chəsə'anabia' lao yežlyon' bagosə'əzolene'ene'. Na' yoguə' beṇə' ža' yežlyon' bagwse'eje' bino de'en bnežjue' lega'aque' par ničh gosə'əzelaže'e gosə'anitə'ləlene' le'.

<sup>3</sup>Nach lao ben Spirit che Diozən' par ble'idaogüe'eda' de'e quinga, anglən' gwchi'e nada' latjə dašən'. Na' ble'ida' to no'olə žie' cožə' to bež əṇṇa bia gažə yichjən' na' žia ši lozəb. Na' nyoj zan dižə' lao cuerp chebən' de'en chlœ' de que chon cuimb ca Dioz. <sup>4</sup>Na' no'olən' nyaze' lachə' morad na' de'e xṇa na' non cuine' xoche len or, len yej fin, na' len perlas. Na' noxe'e to tas de or gan' yo'ožə to bino. Na' binon' zejen dižə' de que chebeine' chone' yoguə'əloj de'en chgue'i Diozən' na' de'en naquə contr Diozən'. <sup>5</sup>Na' lao xgue' na' nyoj le'enə', na' ngašə' can' zejen, chedə' nan quinga:

“Syoda Babilonia de'en naquə de'e blao. Nada' chona' par ničh beṇə' ža' yežlyon' bito chso'elaogüe'e Diozən' na' chso'one' bichlə de'en chgue'i Diozən'.” <sup>6</sup>Na' ble'ida' de que chzože no'olə na'anə'. Chzožene' chedə' güe'eje' xchen beṇə' ca' gwso'ote'enə' beṇə' ca' gwsa'aque' lažə' na' Diozən' na' gwso'e dižə' de que chso'onlilaže'e Jeso'osən'. Na' catə' ble'ida' no'olənə' lechguale bebanda' can' naque'enə'. <sup>7</sup>Nach gož anglən' nada': —Bito yebando'. Na' gwzejni'ida' le' bi zejen ca de'en ble'ido' žia no'olən' bežən' bia gažə yichjən' na' žia ši lozəb.

<sup>8</sup>Bežən' bian' ble'ido'on gwzob

to tyemp. Bitoch zob ṇa'a, pero güidəb de'e yoblə la' əchojəb lo'o yech gabilən' gan' yo'ob ṇa'a, na' leczə na'an yeyo'ob gaquəb castigw zejlicane. Na' beṇə' ca' ža' yežlyon' beṇə' ca' cui zjənyoj laga'aque'enə' le'e libr gan' nyoj la beṇə' ca' zjənapə yelə' mban zejlicanen', yesə'ənaogüe' bežən' na' yesyə'əbanene' can' gwzob antslə, na' ca'aczən' sob ṇabi'ab de'e yoblə la'əṇə'əczə cui zob ṇa'a. Catə'an cuinə' xə yežlyon' banyoj la beṇə' ca' zjənapə yelə' mban zejlicane le'e librən'.

<sup>9</sup>Na' nga de to yelə' sin' de'e əgwzejni'in chio'o che bežən'. Yichjəb ca' gažə zejen gažə ya'a gan' chi' no'olən'. <sup>10</sup>Na' leczə yichjəb ca' gažə zejen gažə rei. Gueye'e bagosə'anabi'e na' bagwnit yelə' gwnabia' chega'aque'enə'. Toe' chnabia' ṇa'a, na' ben' yeto ze'e yide' par ṇabi'e pero na' šložgan' ṇabi'e. <sup>11</sup>Na' bežən' bian' gwzo antslə na' bitoch zob ṇa'a zejen yeto rei beṇə' gaquə ca beṇə' ca' gažə. Gone' yoguə'əloj de'e mal ca de'en gwso'one'enə' na' ṇabi'e xte catə' gon Diozən' par ničh cuiayi'e zejlicane.

<sup>12</sup>Na' lozəb ca' ši de'en ble'ido' zejen ši rei beṇə' ze'e za'ac par yesə'anabi'e. Na' bežən' gomb par ničh yesə'anabi'e txen len leb tši'izə pero šložgan' yesə'anabi'e len leb. <sup>13</sup>Rei ca' ši tozə can' so'one' xbab na' tozə can' so'one' de'e malən'. Na' yelə' guac de'en gatə' chega'aque'enə' na' len yelə' gwnabia'anə' yesə'əchine'en par so'one' con can' yene'e bežən'.

<sup>14</sup>Yesə'ədi'ləlene' Jesocristən'



ben' gwxaquə'əlebe ca xilə' dao'  
ca' gwso'ot beṇə' Izrael ca' par  
gwnitlao xtolə'əga'aque'enə', na'  
Jesocristən' gone' lega'aque' gan  
na' nite'e xni'enə', chedə' le'enə'  
chnabi'e notə'ətezəchlə beṇə' blaο  
na' notə'ətezəchlə rei. Na' beṇə'  
ca' so'on txen len Jesocristən'  
zjənaque' beṇə' ca' bagwlej Diozən'  
par zjənaque' xi'ine', na' nitə'ətezə  
nite'e chso'onlilaže'ene' na'  
choso'ozenague' che'.

<sup>15</sup>Na' anglən' gozne' nada': —  
Nisda'onə' gan' chi' no'olə sargatən'  
zejen dižə' de que beṇə' zan juisy  
beṇə' zjənaquə zan yež na' zan  
nasyon na' beṇə' chsa'ac gwde gwdele  
dižə' choso'ozenague' che no'olən'.  
<sup>16</sup>Na' bežən' bian' žie'enə' gue'ib le',  
na' leczə can' so'on rei ca' ši, beṇə'  
ca' ble'ido' che ši loz bežən', leczə  
yesə'əgue'ine' no'olən' na' txen len  
bežən' yesyə'əque'le bitə'ətezə de'en  
de che' na' yesə'əcua'aṇe' ga'alyide'.  
Na' so'ote'ene' nach əsa'ogüe'  
xpele'enə' txen len bežən' na' de'en  
yega'aṇən' yoso'ozeye'en. <sup>17</sup>So'one'  
ca' chedə' Diozən' cue'e xbabən'  
lo'o yichjla'ažda'oga'aque'enə' par  
yoso'ožiyai'e no'olən'. De'e na'anə'  
nacho de que tozə naquə xbab che  
ši rei ca' par so'one' con can' yene'e  
bežən' xte so'one' yoguə' can' babžia  
Diozən' bia' gaquə. <sup>18</sup>Na' no'olə  
sargatən' ble'ido'on naque' syoda  
de'en naquə le'ezelaogüe de'e blaο  
lao yežlyon' na' de'en chnabia' rei ca'  
beṇə' ca' ža' yežlyon'.

Can' gaquə catə' cuiayi'  
syoda Babilonian'

**18** Na' gwde na' ble'ida' yeto  
angl ze'e yoban' betje' lao

yežlyon'. Na' nape' yeļə' chnabia'  
xen par chac can' ne'enə', na' yeļə'  
chey che'eni' che'enə' bse'eni'in  
lao yežlyon'. <sup>2</sup>Na' anglən' gwne'  
zižjo gwne': —Babžin ža cuiayi'  
syoda Babilonian'. Gaquən latjə  
che angl bzelaο ca' na' de'e xio' ca'  
na' latj che yoguə' claste bia zo  
xile'e bia zjənaquə bia zban par len  
beṇə'chən'. <sup>3</sup>Cuiayi'in chedə' beṇə'  
gwnabia' che syodan' bagwso'one'  
par niç beṇə' ca' ža' yoguə'  
nasyonṇə' baboso'ozoe' Diozən'  
ca'alə na' cuich chso'elaogüe'ene',  
na' beṇə' ca' chəsə'ənabia' doxen  
lao yežlyon' choso'ozenagzeche' che  
beṇə' gwnabia' che syodan' cle ca  
che Diozən'. Na' beṇə' güen dilgens  
ca' ža' lao yežlyon' bagwso'onchgüe'  
gan chso'ote'e bi de'en chəsə'əzi'  
beṇə' gwnabia' ca' par gwso'onche'  
de'e malən'.

<sup>4</sup>Nach benda' gwne' yeto beṇə' zo  
yoban' gwne': —Le'e nacle xi'ina'  
le'e yeçoj syoda Babilonian' par  
niç cui gonje txen len de'e malən'  
chso'on beṇə' Babilonia ca', na' par  
niç cui si'ile castigon' txen len  
lega'aque' na' len yeziquə'əchlə  
beṇə' ca' choso'ozenag chega'aque'.  
<sup>5</sup>Leçgualə de'e zan juisy xtolə'  
beṇə' Babilonia ca'. De'e na'anə'  
bitoch cuezə Diozən' par əgwnežjue'  
castigw chega'aque' zejlicane. <sup>6</sup>Na'  
beṇə' gwnabia' che Babilonian'  
na' len beṇə' ca' choso'ozenag  
chega'aque' yesə'əyi' yesə'əzaque'e  
can' boso'oçhi' boso'osaque'e beṇə'  
yoblə, yesə'əžaglaogüe' mazəchlə  
can' boso'oçhi' baboso'osaque'e  
beṇə' yoblə. Leçgualə castigw  
gualəch gaquə de'en yesə'əzi'enə'  
clezə ca de'en gwso'onene' beṇə'

ca' boso'oçhi' boso'osaque'e.  
 7Na' ca naquə beṇə' gwnabia'  
 che Babilonian' lechguale  
 bagwso'on cuinga'aque' xen  
 na' lechguale bagwso'one' con  
 bin' na la'ažda'omalga'aque'enə',  
 ca'aczən' yesə'ayi' yesə'əzaque'e  
 na' yesyə'əgüine'ene'. So'one' xbab  
 lo'o yichjla'ažda'oga'aque'enə' de  
 que cuat te cuich yesə'anabile'  
 na' syempr yoso'ozenag beṇə'  
 chega'aque'. 8Pero lao tozə ža  
 gaquə yoguə' de'e ca' so'one' xbab  
 cuat gaquə chega'aque'. Beṇə'  
 zan sa'ate' na' gatə'əchgua de'e  
 yesyə'əgüine'ene' na' gatə' yelə'  
 chbil chdon na' syodan' šeyən  
 na' cuiayi'in. Can' gac che syoda  
 Babilonian', chedə' la' Xancho  
 Diozən' len yelə' guac che'enə'  
 gone' par niç beṇə' gwnabia' chei  
 ca' na' len beṇə' ca' choso'ozenag  
 chega'aque' yesə'əzi'e castigon'.  
 9Na' beṇə' gwnabia' ca' ža' lao  
 yežlyon' beṇə' ca' boso'ozenag che  
 beṇə' Babilonia ca' par boso'ozoe'  
 Diozən' ca'älə na' par gws'o'one' con  
 can' na la'ažda'omalga'aque'enə'  
 yesə'əbeže' na' yesyə'əgüine'ene'  
 catə' yesə'əle'ine' šey syodan' na'  
 chas žen chein'. 10Yesə'əžebe' par  
 yesyə'əbigue'e gałə'əzə. De'e na'anə'  
 yesyə'əga'aṇe' zitə'ələ yesə'əgüie',  
 na' yesə'əne': —De'e mal juisy  
 bachac che syoda Babilonia nga  
 de'en naquə de'e blaoch ca syoda  
 ca' yelə' lao yežlyon'. Bachbiayi'  
 syodan' de'en bagwnabia'ach lao  
 de'e ca' zjəchi' yežlyon'. Lao tozə or  
 baben Diozən' par chbiayi'in.  
 11Nach beṇə' güen dilgens ca'  
 ža' lao yežlyon' leczə yesə'əbeže'  
 na' yesyə'əgüine'ene' catə' cuiayi'

syodan'. Yesyə'əgüine'ene' chedə'  
 cuich no əžel no yesə'əzi' de'en  
 so'ote'enə'. 12Bito əžel no yesə'əzi'  
 de'en se'enene' so'ote'e de'en naquə  
 de or, de plət, de yej fin, de perlas,  
 na' no lachə' fin de lino na' de sed,  
 lachə' morad na' lachə' xṇa, na' no  
 yag de'e chlə' zix, na' yoguə' de'e  
 ca' chso'one' de marfil, de yag  
 fin, de brons, de ya na de marmol,  
 13na' no canel na' bichlə rcaud ca',  
 no yal, no mirra, no perfome, no  
 bino, no set, no yezj fin, no trigw,  
 no go'on, no xilə', no cabey, no  
 carret, na' len no beṇəç beṇə' ca'  
 so'ote'e par əsa'aque' esclabos. 14Na'  
 yesə'əne' che syodan': —Yoguə'  
 de'e ca' de'en gwsa'azləžə'əchgua  
 beṇə' Babilonia ca' yesə'əzi'e lao  
 yelə' gwni'a chega'aque'enə' cuich  
 gaquə yesə'əzi'en na'a. Caguə no  
 beṇə' gwni'a ša'ach Babilonian' na'a  
 par zejlicane, na' notoch no no so  
 no yesə'əzi' de'e šao' de'e güen ca'  
 de'en gosə'əzi' beṇə' Babilonia ca'  
 antslə.

15Na' ca naquə beṇə' güen  
 dilgens ca' beṇə' ca' chso'ote'e de'e  
 šao' de'e güen ca' chəsə'əzi' beṇə'  
 Babilonia ca', bazjənaque' beṇə'  
 gwni'a por de'en chəsə'əzi' beṇə'  
 Babilonia ca'. Lega'aque' yesə'əžebe'  
 catə' yesə'əle'ine' can' gaquə che  
 syodan' na' yesə'əzeche' zitə'ələ  
 yesə'əbeže' na' yesyə'əgüine'ene'.  
 16Na' yesə'əne': —De'e mal juisyən'  
 bagoc che syoda nga de'en goquə  
 blaoch lao syoda ca' yelə' de'en ža'  
 yežlyon'. Beṇə' ca' gwža' syodan'  
 gwsa'aze' lachə' fin na' lachə' de'e  
 color morad na' de'e xṇa. Gwso'on  
 cuinga'aque' xoche len no or, no yej  
 fin na' no perlas. 17Na' lao tozə or

bagwnit yoguə' de'e šao' de'e güen  
čhega'aque' ca'.

Nach yoguə' xan barcw ca' na'  
nochlə beṇə' ca' choso'osa' barcw  
ca' na' beṇə' ca' chso'on žin lo'o  
barcw ca', na' beṇə' ca' chja'ac  
ga yoblə lo'o barcon', yogue'e  
yesə'əzeche' zitə'ələ yesə'əgüie'.

<sup>18</sup>Na' cata' yesə'əle'ine' chas žennə'  
lao syodan' əsa'acbe'ine' de que  
cheyənnə', na' yesə'əne': —Bitoch  
bi syoda yoblə chi' lao yežlyon' de'e  
naquə can' goquə syoda nga.

<sup>19</sup>Nach yoso'ožia yichjga'aque'en  
bište yon' tant nite'e trist,  
na' yesə'əbežyāše'e na'  
yesy'əgüine'ene', yesə'əne': —  
De'e mal juisy bagoc che syoda  
nga de'en goquə blaoch ca syoda  
ca' yelə' lao yežlyon'. Por yelə'  
gwni'a che beṇə' ca' gwža' na'  
yoguə' chio'o bencho gan xen ca  
naquə žinnə' babencho len barcw  
checho quinga. Na' na'a lao tozə or  
bagwžiyai' syodan'.

<sup>20</sup>Na' to beṇə' zo yoban' gwne':  
—Ledoyebēi chio'o zocho yoban', na'  
le'e yebei le'e apostol na' le'e profet  
na' len le'e yeziquə'əchlə bagwlej  
Diozən' par nacle lažə' ne'ene',  
chedə' Diozən' gone' castigw che  
beṇə' Babilonia ca' por ni che de'en  
baboso'ochi' baboso'osaque'e le'e.

<sup>21</sup>Nach to angl gual bcose' to  
yej xen ca yej ca' chso'on žin  
gan' ža' molin, na' bzale'en lo'o  
nisda'onə'. Nach gwne': —Can'  
gaquə che syoda Babilonian', nitən  
can' gwnit yej xennə' de'en bzala'a  
lo'o nisda'onə', cuatəch le'ichon  
de'e yoblə. <sup>22</sup>Cuatəch yesə'əcuež  
beṇə' gocuež ca' Babilonian'. Na'  
cuatəch əso'ole' lao lquey che

syodan'. Cuatəch yoso'ogole' arpa  
o yoso'ocueže' bžejo lao syodan'.  
Notoch no nitə' no so'on žin lao  
syodan', na' cuatəch yenecho  
sšag che yišə de'en chso'ote no'ol  
ca'. <sup>23</sup>Ni quech le'icho be'eni' che  
lampara lao syodan', na' ni que  
yenchecho beṇə' so'on legr lao  
yelə' gošagna', chedə' notoch  
no ša'ach na'. Cuiayi' syoda che  
beṇə' güen dilgens ca', la'anə'əczə  
leg'a'aque' zjənaque' beṇə' blao  
lao yežlyon'. Beṇə' Babilonia ca'  
babesə'əxoayague' beṇə' ža' yoguə'  
nasyon ca naquən' gwso'one'ene'.

<sup>24</sup>Bagwso'ote' profet ca' na'  
notə'ətezəchlə beṇə' gwlej Diozən'  
par gwsa'aque' lažə' ne'ene', na'  
beṇə' Babilonia ca' zjənapə' dolə'  
che yoguə' nochlə beṇə' bagwso'ote'  
doxen lao yežlyon'. De'e na'ana'  
cuiayi' syoda chega'aque'ene'.

**19** Gwde na' benda' angl  
zan juisy beṇə' ža' yoban'  
chso'elaogüe'e Diozən' na' zižjo nen  
cata'ən gosə'əne':

Beṇə' güen juisy naquə Dioz  
chechon'.

Le'ene' babene' par nič beṇə'  
ca' chso'onlilažə' le' cui  
žjəya'aque' lao yi' gabilən'.  
Chey che'eni'ichgua gan'  
zoe'ene' na' napə' yelə' guac  
xen.

<sup>2</sup>Zdaczē' licha ca de'en chnežjue'  
castigw che beṇə' ca' chso'on  
de'e malən', na' chone'  
complir can' ne'ene'.

Baben Diozən' castigw che syoda  
əblao de'en gwxaquə'əlebe ca  
to no'olə sargat  
laogüe de'en gwso'on beṇə'  
gwnabia' chei ca' par nič

beṇə' ža' doxen lao yežlyon'  
boso'ozoe' Diozən' ca'alə cui  
gwso'elaogü'e'ene'.

De'e na'anə' Diozən' babselē'e  
castigw de'en cheyalə'  
yesə'əzi'e ca naquən' gwso'ote'  
beṇə' ca' chso'elao' le'.

<sup>3</sup>Nach de'e yoblə gosə'əne': —

Beṇə' güen juisyən' naquə Diozən'.  
Zejlīcanən' chas ženṇə' gan' chey  
syodan'.

<sup>4</sup>Nach beṇə' golə beṇə' blao  
ca' tapechoa besə'əzo xibe'  
gwso'elaogü'e' Diozən' gan' chi'e  
chnabi'enə', gosə'əne': —Ca'ašgacžə  
gaquə. Beṇə' güen juisyən'  
naquəczə Diozən'.

Na' leczə ca' gwso'on bia ca' tap,  
bia ca' nitə' lao Diozən' gan' chi'e  
chnabi'enə'.

<sup>5</sup>Nach benda' gwṇe to angl do  
gan' chi' Diozən' chnabi'e, na'  
gwne':

Ledoye'ela'och Dioz chechon',  
chio'o naccho beṇə' güen žin  
che' na' chapchone' respet,  
chio'o naccho beṇə' blao na' len  
chio'o cui naccho beṇə' blao.

**Yelə' gošagna' che Jesocristən'  
ben' gwxaquə'əlebe ca xilə' dao'  
ca' gwso'ot beṇə' Izrael ca' par  
gwnitlao xtolə'əga'aque'enə'**

<sup>6</sup>Nach leczə benda' xṇe che  
yezən beṇə' chso'elaogü'e' Diozən'.  
Na' xṇen' nenən can' chsiž yaon'  
catə' dechguan na' ca nen catə'ən  
lechguale chašjw chtin. Na'  
gosə'əne':

Beṇə' güen juisy naquə Xancho  
Diozən'.

Nape' le'ezelaogüe yelə' guac  
xen na' chnabi'e.

<sup>7</sup>Ledoyebei, ledoso mbalaz, na'  
ledoye'ela'och le',  
chedə' babžin ža əgwšagna'  
Jesocristən' ben'  
gwxaquə'əlebe ca xilə' dao' ca'  
gwso'ot beṇə' Izrael ca' par  
gwnitlao xtolə'əga'aque'enə'.  
Bazo no'olən' si'e par gaque'  
xo'ole'.

<sup>8</sup>Na' baben Jesocristən' par niçh  
no'olən' nyaze' lachə' fin  
de'en naquə šyiš xilə' juisy na'  
de'en cui naquə manch.

Na' lachə' fin de'en nacho nyaz  
no'olən' de'en naquə de'e šyiš zejen  
dižə' de que chio'o bagwlej Diozən'  
par naccho lažə' ne'ena' zotezə  
zochoncho de'e güenṇə'.

<sup>9</sup>Nach anglən' bolgüižə' nada' de'e  
yoblə gwne': —Bzoj de que mbalaz  
beṇə' ca' bazžənaquə combid par  
əžja'aque' gan' gaquə yelə' gošagna'  
che Jesocristən' ben' gwxaquə'əlebe  
ca xilə' dao' ca' gwso'ot beṇə' Izrael  
ca' par gwnitlao xtolə'əga'aque'enə'.

Na' anglən' leczə gože' nda': —  
Diozən' babene' par niçh gwnia' ca',  
na' naquən de'e li.

<sup>10</sup>Nach bzo xiba' par güe'elaogua'a  
anglən', pero anglən' bito be'e latjə,  
gwne': —Bito gonon' ca'. Be'elao'  
Diozən'. Nada' naca' to beṇə' güen  
xšine' can' naco' le' na' ljuežjo' ca'  
beṇə' ca' leczə chso'e dižə' de que  
chso'onlīlaže'e Jeso'osən'.

Na' ca'aczən' naquən, notə'ətezcho  
cho'echo dižə' de que chonlīlažə'əcho  
Jeso'osən', zo Spirit che Diozən' len  
chio'o chonən ca cho'echo xtiže'enə'.

**Ben' žia cožə' cabey šyišən'**

<sup>11</sup>Nach ble'idaogüe'eda' nla'axejə  
yoban' na' ble'ida' to cabey šyiš

na' Jeso'osən' žie' cožə'əbən'. Len' chone' par niçh chac can' ne'enə' na' le' syempr choe' dižə' li. Zdacze' licha ca de'en chçhoglaogü'e'en che yoguə'əloj beṇə' šə non' napə dolə', na' zdacze' licha can' chdiləlene' de'e malən'. <sup>12</sup>Jelaogü'e' ca' chsa'actitən ca to yi' de'e chalə'əṇiṇ, na' zan coron nitə' yichje'enə', na' lao xgue'enə' nyoj yeto le' de'en cui nombia' nochlə beṇə'. <sup>13</sup>Na' nyaze' to lachə' de'e dopə chen, na' yoso'osi' beṇə' le' Xtižə' Diozən'. <sup>14</sup>Na' angl ca' ža' yoban' beṇə' zjənaquə soldad che Diozən' gosə'ənaogü'e'ene', zjənyaze' lachə' fin de'en naquə de'e šyiš na' de'e cui naquə manch, na' yogue'e zjəžie' cabey šyiš. <sup>15</sup>Na' cho'enə' zo to spad de'e nłachguan par niçh gwzo'e beṇə' ca' ža' yoguə' nasyon xni'enə'. Nabi'e lega'aque' na' gone' ca yesə'əzexjw yichjga'aque' laogü'e'enə'. Le'enə' əgwnežjue' castigw che beṇə' ca' chso'on de'e malən', chedə' chž'a'achgua Diozən' lega'aque', Dioz ben' napə le'ezelaogü'e yelə' guac xen. <sup>16</sup>Na' le'e xadon che Jeso'osən' na' len le'e ni'enə' nyoj dižə' quinga: “Nada' chnabi'a notə'ətezəchlə rei na' notə'ətezəchlə beṇə' blao.”

<sup>17</sup>Nach ble'ida' to angl zeche' lao bgüižən' na' bolgüiže' yoguə' claste šod ca' bia ca' chaš le'e yoban' na' gože' lega'aquəb zižjo: —Le'e da leyedobə nga par gaole to xš'e xen de'e gon Diozən' le'e. <sup>18</sup>Gatə' xpelə' rei, na' xpelə' no comandant na' no beṇə' gual. Gatə' xpelə' cabey na' xpelə' beṇə' ca' gosə'əbia lega'aquəb. Gatə' xpelə' yoguə' claste beṇə', beṇə' gwsa'ac esclabos

na' beṇə' cui gwsa'ac esclabos, beṇə' gwsa'ac beṇə' blao na' beṇə' cui gwsa'ac beṇə' blao.

<sup>19</sup>Na' ble'ida' bež gaž yichjən' na' bežən' yeto len yoguə'əloj rei ca' na' yoguə' soldad zan che rei ca'. Baçh nite'e probnid par yesə'ədiləlene' Jeso'osən' ben' žia cožə' cabey šyišən' na' len soldad che' ca'. <sup>20</sup>Na' bež nechən' len bia əgwchopen' bian' choe' dižə' goxoayag par niçh beṇəchən' chso'elaogü'e'e bež nechən', çhorteb besə'ədolə' na' gwsa'aquəb lao na' Jeso'osən'. Bež əgwchope na'anə' bian' ben de'e zan de'e besyə'əbane beṇə' lao bež nechən' par bxoayaguəb beṇə' ca' nitə' señy che bež nechən' na' beṇə' ca' chse'ejni'alažə' lgua'a lsaquə' de'en naquə ca leb. Na' nežjəmbanga'aquəb bzalə' Jeso'osən' lega'aquəb lo'o yi' gabilən' gan' chalə' sofrən', to yi' xen de'en naquə ca to nisdao'. <sup>21</sup>Na' Jeso'osən' ben' žia cožə' cabey šyišən' bete' rei ca' na' soldad zan chega'aque' ca' len spadən' de'en zo cho'enə' de'en nłachgua. Nach yoguə'əloj šod ca' gwsa'oxatəb xpelə'əga'aque'enə'.

### Can' gaquə lao tmlil iz

**20** Na' ble'ida' to angl beṇə' zo yoban' betje' par bsaljue' yech gabilən', na' noxe'e to gden xen. <sup>2</sup>Na' anglən' bnize' belən' bian' beyaque gwxiye'enə' ža gwlasda'ote, de'en le Satanas, na' bcheje'eb gdenṇə' par tmlil iz. <sup>3</sup>Nach bzalə'eb lo'o yech gabilən' na' le'e bseyjwctie' cho'a yechən', na' bchiše'en to sey. Bene' ca' par niçh cuich xoayaguəb beṇə' ža' yežlyon' xte catə' te tmlil iz. Cana'ach yoseže'eb yechojəb yeto tyemp dao'.

<sup>4</sup>Nach ble'ida' zjäch'i' beṇə' chəsə'ənabia' t xen len Cristən' na' yogue'e len le' gosə'əchoglaogü'e'en che beṇə'chən' šə non' napə dolə'. Na' beṇə' ca' chəsə'ənabia' len le' zjənaque' beṇə' ca' cui əgwsə'elao' bežən' nic lgua'a lsaquə' de'en naquə ca leb, na' bito gwsə'le latjə yoso'ozoe' señy chebən' lao xgaga'aque'enə' o na'aga'aque'enə'. Gwsə'le dižə' de que chsə'onlilaže'e Jeso'osən', na' bosə'ozenague' che xtižə' Diozən'. De'e na'anə' beṇə' ca' chəsə'əgue'i Diozən' gwsə'ote' lega'aque' gosə'əchogue' yenga'aque'enə'. Pero babesyə'əbane' ladjo beṇə' guat ca' nič chəsə'ənabi'e t xen len Cristən' tml iz. <sup>5</sup>Cristən' bolis bosbane' lega'aque' ladjo beṇə' guat ca' antslə ca beṇə' yeziquə'əchlə. Na' catə' te yesə'ənabi'e tml iz, cana'ach yeziquə'əchlə beṇə' ca' bagwsa'at yesyə'əbane' ladjo beṇə' guat ca'. <sup>6</sup>Mbalaz par beṇə' ca' babəlis bosban Cristən' ladjo beṇə' guat ca' antslə ze'e solao tml izən', beṇə' ca' bagwlej Diozən' par zjənaque' lažə' ne'enə'. Bito gac chega'aque' can' gac che beṇə' ca' yesə'əžaglaochgua zejlicane. Na' de'en yesə'əžaglaochgü'e' zejlicane lennə' naxo yelə' got əgwchopen'. Na' beṇə' ca' zjənaque' lažə' na' Diozən' nite'ətezə' nite'e əsə'elaogü'e'ene' na' əsə'elaogü'e' Cristən' can' gwnitə'ətezə' gwnitə' bəxoz che beṇə' Izrael ca' gwse'ejni'alaže'e Diozən'. Na' beṇə' ca' zjənon cuinga'aque' lažə' na' Diozən' lega'aque' yesə'ənabi'e t xen len Cristən' tml iz.

<sup>7</sup>Na' catə' bagoc tml iz chəsə'ənabi'e, Diozən' gü'e'le latjə

yechoj gwxiye'enə' de'en le' Satanas lo'o yech gabilən' gan' yo'on. <sup>8</sup>Na' yechojən par əxoayaguən beṇə' ca' ža' doxenlə lao yežlyon' de'e yoblə, beṇə' ca' chəsə'əne' Gog na' Magog. Gwxiye'enə' əxoayaguən lega'aque' na' əgwtoḃən lega'aque' par yesə'ədiləlene' Cristən'. Na' beṇə' zan juisy əgwtoḃən contr Cristən' ca yox zannə' de'en chi' cho'a nisdao'. <sup>9</sup>Nach ble'idaogü'e'eda' chac ca', za'ac beṇə' zan doxenlə lao yežlyon' na' gwse'əchje' syodan' chaque Diozən' chei gan' ža' beṇə' ca' bagwleje' par zjənaque' lažə' ne'enə'. Nach Diozən' bene' par nič bchoj yi'ina' yoban' bžinten lao yežlyon' par bžiyai'in beṇə' ca' bəbtob gwxiye'enə'. <sup>10</sup>Na' ca naquə gwxiye'enə' de'en bəxoayag beṇə' ža' yežlyon', Cristən' bzale'en lao yi' gabilən' gan' chalə' sofrən', lo'o yi' xen de'en naquə ca to nisdao'. Bzale'en gan' bzale'e bež nechən' na' bež əgwchopə bian' bəxoayaguəḃ beṇə'chən' len dižə' güenlažə' chebən'. Na' chəsə'əžaglaogwxiye'enə' len bež ca' lo'o yi' gabilən' do ža do yel par zejlicane.

**Diozən' gwchoglaogü'e'en che beṇə' ca' bagwsa'at šə non' napə dolə'**

<sup>11</sup>Nach ble'ida' chi' Diozən' lao to siy xen de'en naquə de'e šyiš na' chnabi'e. Na' leczə ble'ida' benittecə yežlyon' na' de'e ca' chle'icho le'e yoban' chedə' bitoch byažjga'aquen. <sup>12</sup>Na' ble'ida' beṇə' ca' bagwsa'at sin cui gwsə'onlilaže'e Jesocristən', beṇə' ca' gwsa'ac beṇə' blaο na' len beṇə' ca' cui gwsa'ac beṇə' blaο. Yogue'e zjəzeche' lao Diozən'. Nach Diozən'

bzaše' libr ca' gan' zjənyoj yoguə' de'e ca' gwsə'on to toga'aque'. Nach gwde na' bzaše' yeto libr gan' zjənyoj la beṇə' ca' zjənapə' yelə' mban zejlicanən'. Na' yoguə' beṇə' ca' gwsa'at sin cui gwsə'onliləže'e Jesocrstən' gwchoglaogüe'en cḥega'aque' de que yesə'əzi'e castigw segon bin' gwsə'on to toga'aque', con can' nyoj le'e libr ca'.<sup>13</sup> Na' yoguə' beṇə' bagwsa'at lo'o nisdə'onə' sin cui gwsə'onliləže'e Jesocrstən' lenczəga'aque' besyə'əchoje' par gosə'əzeche' lao Diozən' na' le'egatezə ca' yoguə' beṇə' bagwsa'at gatə'ətezəchlə leczə besyə'əchoje' latj cḥe beṇə' guat ca'. Na' Diozən' gwchoglaogüe'en cḥe to toga'aque' de que yesə'əzi'e castigw segon can' gwsə'one'.<sup>14</sup> Nach Diozən' bcueze' yelə' gotən' de'en n̄acho de'e neche. Bene' par niçh cuich no yežin latjə cḥe beṇə' guat ca'. Na' de'en yesə'əzaquə'əzi' beṇə' güen de'e mal ca' lo'o yi' gabilən' zejlicanə, lennə' de'en n̄acho yelə' got əgwchopen'.<sup>15</sup> Yoguə' non' cui nyoj leinə' le'e libr gan' nyoj la beṇə' ca' zjənapə' yelə' mban zejlicanə, bosə'ozalə'ene' lo'o yi' gabilən' de'en naquə de'e xen ca nisdəo'.

Yežlyon' beyaquən de'e cobə len de'e ca' chle'icho le'e yoban'

**21** Gwde na' ble'ida' de'e ca' chle'icho le'e yoban' zjənaquən de'e cobə, na' leczə ble'ida' yežlyon' de'e cobə. Ca naquə de'e ca' zjənla' le'e yoban' antslə, na' ca naquə yežlyon' de'en banombi'acho, bagwde cḥega'acquən. Na' leczə nisdə'onə' bagwde cḥei.

<sup>2</sup>Nada' Juan ble'ida' syoda cḥe Diozən', syoda Jerosalennə' de'en naquə de'e cobə de'en chi' yoban' gan' zo Diozən', ble'ida' bletje'en lao yežlyon'. Banonšəagüe'en na' banone'en xocḥe ca to no'olə cḥpa'a cuine' catə' chšagne'e.<sup>3</sup> Nach do gan' chi' Diozən' chnabi'e benda' gwṇe to anglən' zižjo gwne': — Syoda cḥe Diozən' babžinən gan' ža' beṇəçhən' na' Diozən' soe' len lega'aque'. Beṇəç ca' əsa'aque' xi'ine' na' le' gaque' Dioz cḥega'aque' ben' əso'elaogüe'e.<sup>4</sup> Na' Diozən' gone' par niçh cuich nite'e trist, notoch no gat, na' notoch no no yegüine'e, ni que gaquə bi de'en yesə'əzəglaogüe' o bi de'en gon par yesə'əbeže'. Bagwde cḥe yoguə' de'e ca' zjənac ca' de'en gotə' lao yežlyo nechən'.

<sup>5</sup>Nach Diozən' ben' chi' chnabia' gwne': —Nada' chocoba' yoguə'əlo' de'en de.

Na' leczə gwne': —Bzoj de'e quinga cḥedə' nada' chona' can' nia'anə' na' syempr cho'a dižə' li.

<sup>6</sup>Nach gozne' nada': —Baçh goc can' gwni'anə'. Nadan' naca' ben' ben yežlyon' na' nada' naca' ben' gon par niçh te cḥei. Nadan' bazocza' catə'an bxi'a yežlyon' na' ca'aczən' soa' catə'an yeyož yedon. Notə'ətezə beṇə' chene'ene' si'e de'en gwnežjua'ane', gwnežjua'ane' yelə' mban zejlicanə de'en gwxaquə'əlebe ca nis ya'a de'en cḥe'ejcho catə'an chbilecho, na' gwnežjua'ane'en sin cui bi yesə'əyixjue' cḥei.<sup>7</sup> Na' notə'ətezə beṇə' šə chasə'əzoine' cui choso'ozenague' cḥe de'e malən', gac cḥega'aque' yoguə'

de'e güen ca' de'en babi'a dižə' chei, na' caguə de'e te cuich gaca' Dios ben' əso'elaogü'e na' caguə de'e te cuich əsa'aque' xi'ina'. <sup>8</sup>Pero na' ca naquə beṇə' ca' chəsə'əžeb par yoso'ozenague' chia', na' beṇə' ca' cui chso'onlilažə' nada', na' beṇə' ca' chso'on bitə'ətezə de'en chgue'ida', na' beṇə' ca' chso'ot beṇə' yoblə, na' beṇə' ca' chəsə'əbejyichj no'ol chega'aque' o be'en chega'aque' par chesə'əzolene' beṇə' yoblə, na' beṇə' chəsə'əža' xtoga'aque', na' beṇə' ca' chəsə'ənao de'en chso'on beṇə' ca' chəsə'ənelen de'e xio', na' beṇə' ca' chse'ejni'alažə' lgua'a lsaquə', na' yoguə' beṇə' ca' chso'e dižə' güenlažə', yoguə'əga'aque'enə' yesə'əzaquə'əzi'e zejlicane lo'o yi' gabilən' gan' chalə' sofrən', na' yi' gabilən' naquən ca to nisdəo'. Na' de'en gac chega'aque' lenṇə' yelə' got əgwchopen'.

**Syoda Jerosalen de'en  
naquə de'e cobə**

<sup>9</sup>Na' ble'ida' angl ca' gažə beṇə' ca' gwso'oxə' gažə tas gan' yo'ožə de'en gwxaquə'əleben ca gažə castigw de'en bnežjw Diozən' beṇə' mal ca'. Na' toe' bgüiguə' gan' zoa'anə' na' gože' nada': — Da gwlo'ida' le' no'olən' ze'e si' Jesocristən' par gaque' xo'ole', Jesocrist ben' gwxaquə'əlebe ca xilə' dao' ca' gwso'ot beṇə' Izrael ca' par gwnitlao xtolə'əga'aque'enə'.

<sup>10</sup>Na' Spirit che Diozən' benən par niç anglən' gwche'e nada' to lao ya'a xen de'en naquə de'e sibə par niç blo'ine' nada' syoda əblao che Diozən', syoda Jerosalennə' de'en

gwche' yoban' gan' zo Diozən' de'en babletje' lao yežlyon'. <sup>11</sup>Na' ble'ida' chey che'eni' syodan' len yelə' chey che'eni' che Diozən', na' ble'ida'an ca to yej fin de'e chactit, ca yej de'en ne' jaspe de'en chle'icho ca bidr. <sup>12</sup>Na' ble'ida' to ze'e xen de'e sibə de'en nyechj syodan', na' nitə'nən šižin puert, na' to to cho'a puertən' zjəzecha tgüejə angl. Na' ca naquə puert ca' zjənyojən la šižin famiły che beṇə' Izrael ca' beṇə' ca' za'ac lao dia che to to xi'in de'e Izraelən'. <sup>13</sup>Le'e ze'e galən' chla' bgüižən' nitə' šonə puert, na' yešonən cuitən licha, na' yešonən cuitən yeglə, na' yešonən galən' chen bgüižən'. <sup>14</sup>Na' ble'ida' lan ze'enə' de'en nyechj syodan', naquən šižin yej xen na' zjənyoj le'e yej ca' la šižin apostol che Jesocristən' ben' gwxaquə'əlebe ca xilə' dao' ca' gwso'ot beṇə' Izrael ca' par gwnitlao xtolə'əga'aque'enə'.

<sup>15</sup>Na' anglən' ben' be'elen nada' dižə'nə' noxe'e to ya de or par gwsie medid che syodan' na' len ze'e cheinə' na' puert chei ca'. <sup>16</sup>Syodan' naquə de'e cuadrad, na' tozə can' naquə yelə' zlague'i len yelə' ltonei na' len yelə' sib chein'. Na' medid che syodan' goquən çhopa mil çhopə gueyoa kilometros. <sup>17</sup>Nach gwde na' gwxi'e ze'e de'en nyechj syodan' medid, na' goquən gyon tap metr yelə' sib chein' segon metr de'en chesə'əchin beṇəchən' na' lenṇə' bchin anglən'.

<sup>18</sup>Ze'e de'en nyechj syodan' naquən de yej de'en nzi' jaspe, na' ble'ida' de que yo'o ca' ža' syodan' zjənaquən porzə de or na' nla'an ca bidr de'en naquə xi'ilažə'. <sup>19</sup>Na'



le'e to to yej xen ca' de'en zjənaquə lan ze'e de'en nyechj syodan' zjənone'en xochē len yoguə' claste yej fin. De'e nechən' da'an jaspe, de'e gwchopen' safiro, de'e gwyoŋe agata, de'e gwdape esmeralda, <sup>20</sup>de'e güeyə' onise, de'e gwxoŋe cornalina, de'e gažə crisolito, de'e əgwχone'e berilo, de'e güei topasio, de'e ši crisoprasa, de'e šnejē jasinto, na' de'e šižineī amatista. <sup>21</sup>Nach puert ca' šižin de'e nitə' che syodan' to toga'quən zjənaquən de to perla. Na' lquey che syodan' zjənaquən porzə de or na' nla' le'inə' can' nla' le'i to de'en naquə de bidr.

<sup>22</sup>Bitobi yo'odao' ble'ida' lao' syodan' chedə' la' do tyempte beŋə' ca' ža' syodan' nite'e lao Xancho Diozən' ben' napə le'ezelaogüe yelə' guac xennə' na' lao Xi'ine' Jesocristən' ben' gwxaquə'əlebe ca xilə' dao' ca' gwso'ot beŋə' Izrael ca' par gwnitlao xtolə'əga'aque'enə', na' beŋə' ca' ža' syodan' chso'elaogüe'e lega'aque'. <sup>23</sup>Bito chyažje bgüižən' ni bio'onə' par yoso'ose'eni'in lao syodan' chedə' nye'eni' syodan' len yelə' chey che'eni' che Diozən' na' che Xi'ine' Jesocristən'. <sup>24</sup>Na' be'eni' che syodan' gwse'eni'in yedote par beŋə' ca' chso'onlilažə' Jesocristən', beŋə' ca' zjənaquə to to nasyon. Na' rei ca' chə'anabia' yežlyon', beŋə' ca' chso'onlilažə' Diozən', yoso'onežjue'ene' yelə' gwnabia' na' yelə' bala'an de'en de chega'aque'. <sup>25</sup>Bito šeyjw puert ca' teža na' caguə batə'əquə gaquə žchol. <sup>26</sup>Na' yelə' xochē na' bitə'ətezəchlə de'e zaque'e de'en gotə' che nasyon ca' gatə'an lao' syodan'. <sup>27</sup>Bitobi de'e mal gaquə lao' syodan', na'

notono gaquə yesyə'əžin syodan' no chon de'e ca' chgue'i Diozən' o no choe' dižə' güenlažə'. Caguə no yesyə'əžin syodan' sino beŋə' ca' zjənyoj laga'aque'en le'e libr che Jesocristən' ben' gwxaquə'əlebe ca xilə' dao' ca' gwso'ot beŋə' Izrael ca' par gwnitlao xtolə'əga'aque'enə'. Le'e libr na'anə' zjənyoj la beŋə' ca' zjənapə yelə' mban zejlicanen'.

**22** Nach blo'ine' nada' yao de'en yožə nis de'en chnežjon beŋəchən' yelə' mban zejlicanen'. Na' nisən' naquən clar juisy ca be'eyə', na' yaon' chchojən gan' chi' Diozən' na' Xi'ine' Jesocristən' chəsə'anabi'e, Jesocristən' ben' gwxaquə'əlebe ca xilə' dao' ca' gwso'ot beŋə' Izrael ca' par gwnitlao xtolə'əga'aque'enə'. <sup>2</sup>Na' yaon' chden gwchol lquey xen che syodan' na' ze yag chopə la'a cho'a yaon', yag de'en chnežjon beŋəchən' yelə' mban zejlicanen'. Na' yoguə bio' chəsə'əbian frot, šižin las lao tгүйz. Na' beŋə' ca' ža' syodan' beŋə' zjənaquə to to nasyon chəsə'əchine' xlague'i ca' par nič nite'e güen. <sup>3</sup>Cuat gatə' de'e gue'i Diozən' lao' syodan'. Diozən' len Xi'ine' Jesocristən' ben' gwxaquə'əlebe ca xilə' dao' ca' gwso'ot beŋə' Izrael ca' par gwnitlao xtolə'əga'aque'enə' zjəchi'e syodan' chəsə'anabi'e, na' yoguə beŋə' ca' ža' syodan' chso'onlilažə'e Diozən' na' nitə'ətezə nite'e chso'elaogüe'ene'. <sup>4</sup>Nitə'ətezə nite'e gan' chəsə'əle'ine' cho'alao Diozən', na' nyoj le'enə' lao xgaga'aque'enə'. <sup>5</sup>Cuat gaquə žchol lao' syodan'. De'e na'anə' bito yažje be'eni' che lampara, nique

yažje be'eni' che bgüižän', chedä' yelä' chey che'eni' che Xancho Diozän' chse'eni'in gan' ža' beṇä' ca' chso'elao' le' na' chesä'änabi'e len le' zejlicane.

**Bazon äžin ža yidä  
Cristän' de'e yoblä**

<sup>6</sup>Nach anglän' gwne' nada': — Yoguä' de'en bagwna Diozän' zjənaquən de'e li na' gaquä can' ne'ena'. Xancho Dioz nan' chbeje' beṇä' par chso'e xtiže'ena' na' le'ena' bsele'e nada' par chzejni'ida' beṇä' ca' chso'elao' le' de'e ca' baza' gaquä. <sup>7</sup>Jeso'osän' ne' de que bazon äžin ža yide' de'e yoblä, na' mbalaz nitä' beṇä' ca' yoso'ozenag che de'e ca' babzojo' le'e librän' noxo'onä', ca naquä de'e ca' ze'e gaquä.

<sup>8</sup>Nada' Juan bzoja' de'en benda' na' ble'ida', na' catä' benda' na' ble'iga'acda'an bzo xiba' xni'a anglän' par güe'elaogua'ane', ben' ben par nič ble'ida'ogüe'eda' yoguä' de'e ca'. <sup>9</sup>Pero anglän' bito be'e latjä, na' gwne': —Bito gono' ca'. Be'elao' Diozän'. Nada' naca' to beṇä' güen xšine' can' naco' le' na' ljuježjo' ca' beṇä' ca' leczä bagwlej Diozän' par chso'e xtiže'ena', na' ca'aczän' yoguä' beṇä' ca' yoso'ozenag che de'e ca' babzojo' le'e librän' noxo'onä'.

<sup>10</sup>Na' leczä gwne' nada': —Bito gwcašo'o che de'e ca' ze'e za'ac can' na libr nga bzojo', chedä' bazon äžin ža gaquä yoguä' de'e ca' bzojo' le'inä'. <sup>11</sup>Bazon äžin ža catä' beṇä' ca' chso'on de'e malän' yesyä'əga'anlenczä de'e mal chega'aque'ena' gabilän'. Na' beṇä' ca' chso'on de'en naquä yelä'

zto' yesyä'əga'anlene' yelä' zto' chega'aque'ena' gabilän'. Na' beṇä' ca' zjənaque' beṇä' güen lao Diozän' so'onche' de'e güennä' zejlicane. Bagwlej Diozän' lega'aque' par zjənaque' lažä' ne'ena' na' zejlicane yesyä'əga'ane' lažä' ne'ena'.

<sup>12</sup>Nach Jeso'osän' gwne': —Bazon äžin ža yida' de'e yoblä, na' gona' castigw che to to beṇäč o gona' par nič gaquä de'e güen che to toga'aque' segon nac gwso'one'.

<sup>13</sup>Nada' naca' ben' ben yežlyon' na' ben' gon par nič te chei. Bazocza' catä'än bxi'a yežlyon' na' ca'aczän' soa' catä'än yeyož yedon.

<sup>14</sup>Mbalaz nitä' notä'ätezä beṇä' bagosä'änabe nada' beca'a xtolä'əga'aque'ena'. Na' gua'a latjä so'e cho'a puert che syodan' gan' zoa'anä' na' gwnežjua' lega'aque' frot che yag yelä' mban zejlicanen'. <sup>15</sup>Pero na' bito gua'a latjä so'o beṇä' ca' cui chso'onlilažä' nada' cho'a puert che syodan'. Bito gaquä so'o beṇä' ca' chesä'änelen de'e xio', na' beṇä' chäsä'əbejyichj no'ol chega'aque' o be'en chega'aque' par chnitä'əlene' beṇä' yoblä o beṇä' chäsä'əža' xtoga'aque'. Bito gaquä so'o beṇä' chso'ot beṇä', beṇä' chse'ejni'alazä' lgu'a' lsaquä' na' notä'ätezä beṇä' chäsä'əbeine' chso'e dižä' güenlažä'.

<sup>16</sup>Nada' Jeso'os bsela'a angl chia'anä' par bzenene' le' yoguä' de'en babzojo' par beṇä' ca' zjəncodä' ljuježje chso'elaogüe'e nada'. Nada' golja' lao dia che de'e Rei Dabin', na' naca' ben' ben Diozän' lyebe əsele'e lao dia che de'e Rei Dabin'. Na' gwxaquä'əlebäda' ca beljw xsilän'.

Nezecho catə' chla' beljw xsilən'  
 bazon še'eni', na' de'en babida'  
 yežlyon' nezecho bazon gaquə  
 yoguə' de'e güen ca' zjənyoj le'e libr  
 nga.— Can' gwna Jeso'osən' nada'.

<sup>17</sup>Chio'o chonlilažə'əcho

Jesocristən' naccho ca to no'olən'  
 si'e, na' chio'o txen len Spirit che  
 Diozən' chnablažə'əcho yob yide'  
 de'e yoblə. Na' yoguə' no yene  
 catə' yoso'olabe' libr nga, leczə  
 yesə'əḡnablažə'əšgue' yob yide' de'e  
 yoblə.

Na' notə'ətezə beḡə' se'ene'ene'  
 so'onlilaže'e Jeso'osən' gatə' yełə'  
 mban zejlicane chega'aque' sin cui  
 bi yesə'əyixjue' chei.

<sup>18</sup>Nach gozna Jeso'osən': —De'e  
 ngan' əchnia' par yoguə' le'e  
 gwlable o yenele catə' beḡə'  
 yoso'olabe' de'e quinga ben Diozən'  
 mendad zjənyoj le'e libr nga.  
 Notə'ətezle šə gwzanchle ca de'en

na libr nga catə' əgwzejni'ile beḡə'  
 che de'e ca' ze'e za'ac, Diozən'  
 gone' par nich gac chele yoguə'  
 de'e mal ca' de'en zjənyoj le'e  
 libr nga. <sup>19</sup>Na' notə'ətezle catə'  
 əgwzejni'ile beḡə' che de'e ca' ze'e  
 za'ac šə cui yene'ele əgwzejni'ile  
 lega'aque' yoguə' de'e ca' ben  
 Diozən' mendad zjənyoj le'e libr  
 nga, Diozən' yoxi'e lalen' le'e libr  
 che'enə' na' bito güe'e latjə yežinle  
 syoda che'enə'. Na' le'e libr che  
 Dioz nan' zjənyoj la yoguə' beḡə'  
 ca' zjənapə' yełə' mban zejlicanen'.

<sup>20</sup>Nach Jeso'osən' ben' bzejni'ine'  
 nada' yoguə' de'e quinga ne': —  
 De'e li yida' lgüegwzə.

Na' nada' goža'ane': —  
 Ca'ašgaczə gaquə. Yob yidəšgo'  
 Xana' Jeso'os.

<sup>21</sup>Xancho Jesocristən' sotezə soe'  
 gaquəlenšgaczə' yoguə'əle. De'e  
 na'azən' de chzoja'. *Juan*